

2 SAMUEL

Oaralap en Pwuhk wet

Keriaun Samuel, iei usepen *Keieun Samuel*, oh e wia koasoiepen mwehin Nanmwarki Depit: mahs, ni eh kaunda wehin Suda ni palieir (ire laud 1-4) oh mwuhr, ni eh kaunda wehio pwon, iangahki wehin Israel me mi ni paliepeng (ire laud 5-24).

Eri, pwuhk wet wia koasoi lingan oh kasel-lel kei duwen sapwellimen Depit mahwen kan ong eh imwintihti kan, loale oh likin wehio; duwen eh ketin kalaudehla sapwellime wehi oh kakehlakahda eh manaman en kaunda wasa. Pil mwahusang, pwuhk wet pil kasalehda mwahu oh sansal duwen aramas emen me ahneki pwoson kehlail oh limpoak mehlel ong Koht, aramas me kin ese kalowehdi mwekid en nan kapehd en nah aramas akan pwe re en loalopwoatohng ih. Ahpw ekei pak pwuhk wet pil kin kadehdehda duwen keptakaien aramas menet, ni eh kin kup-wukupwurehte idawehn mwekid suwed kan en paliwere oh ineng en nan kupwure. Ahpw ni eh mahsanhada suwed en dipe kan me soukohp Nadan kasalehiong, e ketin koluhkihla oh ketin ale kalokolok me Koht ketikihong.

Eri, mour oh wiewia kesempwal en Depit in-enen kamwakidada kapehd en mehn Israel ko, me kahrehda ni ahnsou apwal akan mwuhr, oh ni ahnsou me re uhdahn anahne pil emen nan-mwarki, ihte me re kin ngoangkien, emen me

uhdahn sapwellimen Depit, eri, emen me kisehn kadaudok en Depit me pahn duwehte ih.

Audepe ni Oaralap

Mwehin Depit ni eh kaunda Suda 1.1—4.12

Mwehin Depit ni eh kaunda Israel pwon 5.1—24.25

a. Sounpar en mwowe kan 5.1—10.19

b. Depit oh Padsipa 11.1—12.25

c. Apwal akan 12.26.—20.26

d. Sounpar en mwuri kan 21.1—24.25

Depit ale Pakairpen Sipallahn Sohl

¹ Eri, mwurin Sohl eh sipalla, Depit ahpw pwurodo sang eh kalowehdi mehn Amalek ko oh mihmihki Siklak rahn riau. ² Manda sang rahno, mwahnakapw emen ahpw leledo sang nan kahnimpwal en Sohl. Pwe en kasalehda uwen eh nsensuwed, e tehrpeseng likou me e likawi ko oh kamwerehdiong pwehl pohn moange. E ahpw kohla rehn Depit, poaridiong nanopwel oh rahn-mwahwih. ³ Depit ahpw idek reh, “Ke kohsang ia?”

A e sapengki, “I tangasang nan kahnimpwal en mehn Israel ko.”

⁴ A Depit ahpw idek, “Dah rong?”

A e sapeng, “At karis kan tangasang nan mah-weno, oh nait sounpei tohto pil kamakamalahr, Sohl oh Sonadan pil kamakamalahr.’

⁵ Depit ahpw idek, “Dahme ke esehki me Sohl oh Sonadan sipallahr?”

⁶ A e sapengki, “Ahnsou me I mihmi nin Nahna Kilpoa, I kilangada Sohl eh ireirekengki sapwellime ketieuwo, a werennansapw ko oh

soundake oahs akan en at imwintihti ko kerek-erendohng. ⁷ Sohl eri ketin pirekekte mahsanihiehda, e ahpw malipe ie. I ahpw sapeng, patohwan, ‘Iet ngehi, maing!’ ⁸ E ahpw keinemwe ihs ngehi. Ngehi eri patohwanohng me mehn Amalek men ngehi. ⁹ A e ahpw mahsanih, ‘I lellelehr oh I pahn melahr. Keido met oh kemeiehla.’ ¹⁰ Ngehi eri keilahngete mpe, kadauluhlla; pwe I ese me e pahn sipallahr. Ngehi eri ale nihn me mi pohn tapwio oh luwow me mi nin limeo, eri, iet I patohwandohng komwi, maing.’

¹¹ Depit eri kidahngete peh ko ni eh likou ko, tehrpeseng, uwen eh nsensuwed; oh ienge koaros pil iang tehrpeseng ar likou ko. ¹² Re ahpw mwahieiki Sohl oh Sonadan oh pil mehn Israel ko, sapwellimen KAUN-O ko. Re ahpw kaisihsol lao lel nipwong, pwehki me ngeder rehrail me kamakamala nan mahweno.

¹³ Depit ahpw pil idek rehn mwahnakapw me wadohng pakairo, “Mehnia men kowe?”

A e sapeng, “Ngehi mehn Amalek, ahpw I kin kousoan nan omwi wehi.”

¹⁴ Depit ahpw idek, “A dahme ke nohn kapehd loallapki oh kemehla sapwellimen KAUN-O namwarki me pilipildahr?” ¹⁵ Depit eri malipehdo emen nah sounpei ko oh padahkikhong, “Kemehla lahp menet!” Ohlo eri uhdahte pele mehn Amaleko oh kemehla. ¹⁶ Eri, Depit ahpw ndaiong mehn Amaleko, “Kowe me pein kahrehiong uhk met. Ke pein kadeikuhdada ni omw kasalehda me ke kemehla ih me KAUN-O ketin pilada en namwarki.”

Depit Kedepwidepwki Sohl oh Sonadan

¹⁷ Eri, iei kedepwidepw en Sohl oh sapwellime pwutak Sonadan me Depit wiahda ¹⁸ oh koasoane-hdi pwe aramas en Suda kan en padahngki. (Koul pwoatet ntingdier nan *Pwuken Sasar*.) Eri, iet duwe:

¹⁹ “Pohn nahna kan en Israel atail kaun akan melahr!

Neitail sounpei keieu kommwad akan pwup-wudier!

²⁰ Kaleke kumwail mweseiseikhong mehn Kad, de pakairkiseli nanial en Askelon.

Kaleke pwe kumwail de kahrehiong lihen Pilisdia kan ar perenkihda, oh serepein rotorot kan de ngisingiski ar peren.

²¹ “Keteu oh pwoaiken lahng en sohla kalamwuri dohlen Kilpoa kan; mohsen Kilpoa kan en tehnla wiahla saptehn ahnsou koaros.

Pwe iei wasa ko me men sansar en nait sounpei kommwad ko lekdeklahr ie; iei wasao me sapwellimen Sohl mehn sansar wonohn oh merlahr ie.

²² Nein Sonadan kesik ketieu kin kemehla eh imwitihti kan; sapwellimen Sohl kedlahs sohte mwahn kin pir mwahl; pwe e kin pelehdi me lapalap akan oh kemehla sapwellime imwintihti kan.

23 “Sohl oh Sonadan, ira koaros me kupwurkalah-
ngan oh kapwuriamwei,
ni ara mour oh pil ni ara mehla;
ira koaros marahra sang ikel, ira koaros
kehlailasang laion.

24 “Kumwail lihen Israel kan, kumwail mwahieiki
Sohl!
E ketin kalikawihekin kumwail likou kasel el
oh weitahta,
e ketin kapwatahkin kumwail elin kapwat en
takai kesempwal oh kohl.

25 “Neitail sounpei kommwad akan pwupwudier;
re kamakamalahr nan mahwen.
Sonadan melahr, wonohn pohn nahna kan.

26 “Sonadan riei kompoakepahi, pilen mesei kat
kin kerekerekinuhk;
ia uwen ei poakepoakeiuk kowahlap!
Ia uwen omwi kin poakepoake ie,
soangen limpoak me siksang mehlel limpoak
en lih!

27 “Neitail sounpei keieu kommwad akan pwup-
wudier;
solahr katepen neirail tehtehn mahwen kan.”

2

Depit Wiahla Nanmwarkien Suda

¹ Mwurin mepwukat Depit ahpw kalelapak
rehn KAUN-O, patohwan, “Maing, ia duwe, I en
patolahng ale ehu kahnimw kan en Suda?”

KAUN-O ahpw ketin sapeng, mahsanih, “Ei, kohwei.”

A Depit pil patohwan, “Mehnia, maing?”

KAUN-O ketin mahsanih, “Epron.” ² Depit eri patohla Epron, iangahki eh pwoud riemeno, Ahinoam mehn Sesreel, oh Apikail, liohdio, en Napal me melahro eh pwoud, mehn Karmel. ³ Depit pil kahrehda nah sounpei ko oh ar peneinei kan. Irail eri kohla oh kousoanla nan kahnimw kan me kapilpene Epron. ⁴ Mehn Suda kan eri kohdo Epron oh keiehdi Depit en wiahla nanmwarkien Suda.

Eri, ni Depit eh karongehda me mehn Sapes kan, nan Kilead, sarepedier Sohl, ⁵ e ahpw poaronehla sapwellime aramas ekei pwe re en kairehki mehn Kilead, “KAUN-O en ketin kupwuramwahwi kumwail pwehki amwail loalopwoatohng amwail nanmwarki ni amwail sarepedi. ⁶ Eri, KAUN-O en pil ketin kupwurkalangan oh loalopwoatohng kumwail. I pahn pil apwalih kumwail mwahu pwehki me kumwail wiadahro. ⁷ Kumwail kehlail oh kommwad! Amwail nanmwarki Sohl sipallahr, oh mehn Suda kan keieiedier pwe I en wiahla arail nanmwarki.”

Isposed Wiahla Nanmwarkien Israel

⁸ Apner nein Ner, kaunen sapwellimen Sohl karis, ahpw iang sapwellimen Sohl pwutak, Isposed sopohla oh kotehla Sordan kolahng Mahanaim. ⁹ Apner ahpw wiahkihla Isposed nanmwarkien nan sapwen Kilead, Aser, Sesreel, Epraim, oh Pensamin, oh nan Israel pwon. ¹⁰ E

sounpar pahisek ni ahnsou me e wiahla nammwarkien Israel, oh e kakaunki erein sounpar riau.

Ahpw kadaudok en Suda kin loalopwoatohng Depit, ¹¹ oh e kakaunki Suda nan Epron erein sounpar isuh elep.

Mahwen Nanpwungen Israel oh Suda

¹² Apner oh sapwellimen Isposed lapalap akan ahpw mweselsang Mahanaim ketilahng kahnimw Kipeon. ¹³ Sohap, me eh nohno Seruaia, oh ekei nein Depit lapalap teiko ahpw tuhwong irail pohn leho, wasa irail koaros mwohndi ie, ehu pwihns apali, a ehu pwihns apali. ¹⁴ Apner ahpw ndahng Sohap, “Kitail kihpene ekei mwahnakapw sang pali riau pwukat pwe re en siai en pei.

Sohap eri sapeng, “Me mwahu.”

¹⁵ Eri, ohl ehk riemen me wia wiliepen Isposed oh kadaudok en Pensamin, irail eri peiong nein Depit pil ohl ehk riemen. ¹⁶ Emenemen ohl alehte moangen me e uhwong oh doakoahki nah kedlahs ni pengepenge, eri irail koaros me riehk pahmeno mehla. Ihme kahrehda wasao nan Kipeon adanekihki “Mohs en Kedlahs.”

¹⁷ Lapalahn pei ehu ahpw wiawi, Apner oh mehn Israel ko eri lohdi pahn nein Depit sounpei ko. ¹⁸ Nein Seruaia pwutak silimen ko iang mihami wasao: Sohap, Apisai, oh Asahel. Asahel, iei ih me kin tang marahra duwehte tie, ¹⁹ ahpw pwakih Apner, e tangete inenlahng. ²⁰ Apner ahpw kilengla mwuri oh nda, “Asahel, kowe men?”

E ahpw sapeng nda, “Ei.”

²¹ Apner ahpw nda, “Ke dehr pwakih ie, pwakihala emen sounpei ko oh kihsang eh dipwisou.” Ahpw Asahel pwakipwakihete. ²² Apner pil pwurehng ndalahng, “Ke dehr pwakih ie! Dahme ke nannantih ki I en kemeiukala? Ia pahn mwom-wei ong riomw pwutak Sohap?” ²³ Ahpw Asahel sohte men uhdihsang; Apner sohte pirekeklahng ahpw doangkilahng nah ketieuwo lel kapehde oh pwerla nan tihnsewe. Asahel eri pwupwudi mehla, oh koaros me iang kohdo wasa me e pwupwudieo ahpw uhdi oh nennenla wasao.

²⁴ Apisai oh Sohap ahpw pwakihala Apner, ira ahpw lellahng pohn dohl en Amma ni ketipin eh kihrlahr, wasao mi palimesehn Kia ni ahl me kohlahng sapwtehn en Kipeon. ²⁵ Ohl ako me sang kadaudok en Pensamin ahpw kapilpene Apner oh sinsile pohn dohlo. ²⁶ Apner ahpw likwerlahng Sohap, ketihtihki, “Dah, kitail pahn pepei sohte tokedi? Ke sohte ese me nsensuwedte me pahn wiawi ni imwilahn mepwukat? Kitail tohn wehiteieu. Iahd me ke pahn ndahng noumw ohl akan re en tokedihsg ar pwakipwakih kiht?”

²⁷ Sohap ahpw sapeng, nda, “I kahukihla ni mwaren Koht ieias, ma ke sohte lokaia, nei ohl akan pahn pwakipwakihiuk lao lel nimenseng en lakapw.” ²⁸ Sohap eri peuk sowi pwehn wia kilel ehu ong nah ohl ako me re en tokedihsg ar pwakipwakih mehn Israel ko; peio ahpw tokedi.

²⁹ Apner oh nah sounpei ko ahpw karis kolahng Wahun Sordan erein pwohngo pwon; re kotehla Pillap Sordan, oh mwurin ar karikaris kohla ni-mensengo, re ahpw lellahng Mahanaim.

³⁰ Ni Sohap eh tokedihsgang eh pwepwekio, e ahpw kihpene nah ohl koaros oh diarada me irail me ehk duwemen me sohte mie, likin Asahel. ³¹ Nein Depit ohl ako kemehla nein Apner ohl 360 sang kadaudok en Pensamin. ³² Sohap oh nah ohl ako ahpw ale paliweren Asahel oh wahla sarepedi nan sousoun peneinei nan Pedleem. Re ahpw karikaris nipwongo pwon pwurupwuralahng Epron, re lel mwo nin sohrahn.

3

¹ Peio nanpwungen pali riauo me uhki en Sohl peneinei oh irail kan me uhki Depit ahpw wiewiawihki ahnsou reirei. Pali me uhwong Depit wie luluwetala, nindokon Depit eh wie kekehlailailla.

Nein Depit Pwutak kan

² Irekidien nein Depit pwutak me ipwidi nan Epron: Amnon, eh nohno Ahinoam, sang Sereel; ³ Kileap, eh nohno Apikail, en Napal me melahro eh pwoud, sang Karmel; Apsalom, eh nohno Maaka, sapwellimen Kesur, nanmwarkien Talmai; ⁴ Adonaisa, eh nohno Akkid; Sepataia, eh nohno Apital; ⁵ oh Idream, eh nohno Ekla. Pwutak pwukat koaros ipwidi nan Epron.

Apner Iangala Depit

⁶ Nindokon peio eh nannantihla nanpwungen nein Depit pwihn oh pwihn me loalopwoatohng en Sohl eh peneinei, Apner ahpw wie kekehlaila nanpwungen iengen Sohl ko.

⁷ Rahn ehu Isposed nein Sohl ahpw kadipahki Apner me dene e engda rehn Rispa, en Sohl

eh pekehi, nein Aiah serepein. ⁸ Met inenen kalingaringarihda Apner, e ahpw nda, “Dah, ke lemeleme me I kak kauwehla en Sohl eh kin koapworopworkin ie? Ke lemeleme me I kin uhpaiong Suda? Sang rahn me I tapihada loalopwoatohng pwung en omw pahpao, rie ohl akan, oh kompoakepah kan, oh ngehi kin doandoareiuk pwe ke dehr lohdi pahn Depit; eri met ke diaradahr ei sapwung ong lih emen! ⁹⁻¹⁰ KAUN-O ketin inoukihong Depit me e pahn ketikihsang wehio Sohl oh kadaudoke kan oh ketin wiahkihla Depit namwarkien Israel oh Suda pwon, sang apali wehio lel apali. Eri Koht en ketin kemeiehla ma I sohte pahn kapwaiada met!” ¹¹ Isposed inenen masak Apner me kahrehda e sohla kak nda mehkot.

¹² Apner eri kadaralahng meninkeder kei rehn Depit, me ni ahnsowo mihmi nan Epron, e ketihihki, “Ihs me pahn kaunda wehiet? Kita wiahda ehu inou nanopwungata, I ahpw pahn seweseiuk pwe ke en powehdi Israel.”

¹³ Depit ahpw sapeng, nda, “Me mwahu! Kita pahn wiahda ehu inou nanopwungata ma komw pahn kapwaiada met: komw pahn patohwando Maikal, sapwellimen Sohl serepeino rehi ni omwi pahn patohdo rehi.” ¹⁴ Oh Depit pil kadarala meninkeder kei rehn Isposed, e ketihihki, “Kapwurehdo ei pwoud, Maikal. I pwainkihda kilin nein ohlen Pilisdia me sarawi epwiki pwe I en pwoudiki.” ¹⁵ Isposed eri wahsang serepeino ni imwen eh pwoudo, Paltiel nein Lais. ¹⁶ Paltiel ahpw idawehnla serepeino lel ni kisin kahnimw

Pahurim, wie sengiseng kohla. Ahpw ni Apner eh ndahng, “Pwurala ni imwomwo,” e ahpw pwurala.

¹⁷ Apner eri kohla rehn kaunen Israel ko oh ndahng irail, “Ahnsou reirei kumwail kasikasik Depit en wiahla amwail nanmwarki. ¹⁸ Eri iet amwail ahnsou mwahu en. Kumwail tamataman me KAUN-O, mahsanih, ‘I pahn doadoahngki nei ladu Depit pwe en kapitala nei aramas en Israel sang pahn manaman en mehn Pilisdia kan oh sang ar imwintihi teikan koaros.’” ¹⁹ Apner pil koasoiong kadaudok en Pensamin oh pil douluh-lahng Epron pwehn padahkikhong Depit dahme aramas en Pensamin oh Israel pwungkidahr re en wia.

²⁰ Ni Apner eh lella rehn Depit nan Epron iangahki ohl riehk, Depit ahpw wiahiong irail lapalahn kamadipw ehu. ²¹ Apner ahpw ndahng Depit, “I pahn kohla met oh powehdi Israel ong Wasa Lapalap. Irail pahn perenki wiahkinkomwihla arail nanmwarki, komwi ahpw pahn ketikihda dahme komwi anahne oh pahn kaunda sahpwo pwon.” Depit ahpw ketikihong Apner poadoarepe oh kadarala.

Apner Kamakamala

²² Mwurin ahnsou kis Sohap oh nein Depit lapalap ekei ahpw pwurodohsang ar mahwen, re wa kohdo kiden dipwisou me re kalowehdi. Eri, Apner solahr mi rehn Depit nan Epron ni ahnsowo, pwehki Depit eh kadaralahi iangahki kehkehlik me sohte me pahn wiahiong mehkot suwed. ²³ Ni ahnsou me Sohap oh nah ohl ako lelleddo, e ahpw rongada me Apner patohdo rehn

Nanmwarki Depit oh e pil ketin kadaralahr oh kehkehlingkikhong me sohte me pahn wiahiong me suwed. ²⁴ Sohap eri patohla rehn nanmwarkio oh patohwanohng, “Dahme komw wiadahr? Apner patohdo pahn kupwuromwi—dahme komw kadarkihla duwehte mwo? ²⁵ E patohdo wasaht pwehn pitih komwi oh rapahki soahng koaros me komw kin wiewia oh wasa me komwi kin ketila ie. Komwi uhdahn wehwehki met!”

²⁶ Mwurin Sohap eh mweselsang Depit, e ahpw kadarala meninkeder kei pwe re en wahdo Apner, re ahpw kapwurehdohsang ni Pwarer en Sira; ahpw Depit sasairki ire wet. ²⁷ Ni Apner eh lel nan Epron, Sohap ahpw kahrehla ni wenihmwen kelen kahnimwo, mwomwen me e men koasioong ni rir, e ahpw doakoahdi kapehdeo wasao. Apner kamakamala pwehki eh kemehla rien Sohap pwutak Asahel. ²⁸ Ni Depit eh rongada rohng wet, e ahpw mahsanih, “KAUN-O mwahngih me ngehi oh nei aramas akan sohte ese douluhl kamakamalahn Apner. ²⁹ Kalokolok en ire wet en kohdiong pohn Sohap oh eh peneinei koaros! En kin mie emen ohl sang nan kadaudoke kan koaros me pahn kin ahneki soumwahu konorea de soumwahu tokutok de ihte me e kak wia doadoahk en lih de mehla nan mahwen de sohte pahn kin kene mwenge!” ³⁰ Eri, Sohap oh rie Apisai ikihki Apner eh kemehla riara pwutak Asahel nan mahwen nan Kipeon.

Apner Seridi

³¹ Depit eri koasoanehdi pwe Sohap oh nah ohl ako re en tehrasang ar likou kan oh pwuhrong nan likoun nsensuwed, oh mwahieiki Ap-

ner. Eri, ni seridio pein Nanmwarki Depit iang ket limwahn kohpwao kolahng wasahn seridio. ³² Apner eri seridi nan Epron, nanmwarkio ahpw tentenihr ni kapitie laud ni sousouo iangahki aramas koaros. ³³ Depit eri koulki koulen kedepwidepw wet ong Apner:

“Dahme Apner mehkhila duwehte pweipwei men?

³⁴ Peh ko sohte selidi,
oh neh ko sohte pirapirdi;
oh e mehla duwehte aramas emen me aramas suwed kan kin kemehla!”

Eri, aramas koaros ahpw pil pwurehng sengiseng.

³⁵ Rahn ehu pwon aramas akan ahpw kadekadeke Depit pwe en konot, ahpw e wiadahr inou lap ehu, “Koht en ketin kemeiehla ma I pahn tungoale mehkot mwohn rahn wet eh pahn imwisekla!” ³⁶ Re ahpw esehda met oh nsenamwahula. Mehlel, pwe soahng koaros me nanmwarki kin wia kin kansenamwahihala aramas akan. ³⁷ Sapwellimen Depit aramas koaros nan Israel wehwehki me nanmwarkio sohte iang pid kamakamalahn Apner.

³⁸ Nanmwarkio eri mahsanhong sapwellime lapalap aka, “Kumwail wehwehki me kaun lapalap en Israel men melahr? ³⁹ Mehnda ma ngehi nanmwarki men me Koht ketin pilada, I kehn ei luwet rahnwet. Nein Seruaia pwutak kan me nohn lemei ong ie. KAUN-O en ketin kaloke aramas suwed pwukat nin duwen me konehng irail!”

4

Isposed Kamakamala

¹ Ni ahnsou me nein Sohl pwutak Isposed rongada me Apner kamakamalahr nan Epron, e masepwehkada, oh aramas koaros en Israel pil masepwehkada. ² Nein Isposed lapalap riemen me kaunda pwihn me kin kohseli oh mahweniong wasa kan, Paana oh Rekap, nein Rimmon, sang Peerod, kadaudok en Pensamin. (Peerod iang wadawadohnng kisehn Pensamin. ³ Uhdahn pwilidak en wasao sopolahng Kittaim, wasa re kousoanla ie lel rahnwet.)

⁴ Pil emen kadaudok en Sohliei nein Sonadan pwutak Mepiposed, me sounpar limau ni ahnsou Sohl oh Sonadan kamakamala. Ni ahnsou me rohng en ara mehla leledo sang kahnimw Sesreel, lih me kin apwahpwalih serio ahpw ale serio tangahki; e inenen karuaru kahrehda e kesehdi serio, serio eri dangepella.

⁵ Rekap oh Paana eri mwesel kohla ni imwen Isposed, oh ira lella wasao kerenieng nin souwas, nindokon eh wie komkommoal en souwas. ⁶ Lih me mihami ni wenihmwomen meirla nindokon eh wie koakoa wahn pilawa, e ahpw meirla, Rekap oh Paana ahpw wailong nan ihmwo. ⁷ Ira pedelong nan en Isposed eh perehn meiro, wasa e memeir ie, oh kemehla. Ira pelehsang moangeo, oh wahda, oh alialuhki nan Wahun Sordan erein pwohngo pwon. ⁸ Re ahpw patohwanlahng moangeo rehn Nanmwarki Depit nan Epron oh patohwanohng, “Iet moangen Isposed, nein omwi imwintihti Sohl pwutak, me songosong en kemeikomwihla. KAUN-O mweidohngehr Wasa Lapalap en ikih Sohl oh kadaudoke kan.”

⁹ Depit ahpw sapeng irail, mahsanih, “I wiadahr inou lap ehu ni mwaren KAUN-O me ketin ieias, me ketin kapitiehla sang apwal koaros! ¹⁰ Meninkeder me kohdo rehi nan Siklak oh ndahng ie duwen Sohl eh melahr, e wiahki me rohng mwahu ehu mwo. I koledi oh kemehla. Ihme I katingiheki eh rohng mwahwo! ¹¹ Ia uwen eh pahn suwed sang ni aramas suwed kan ar pahn kemehla aramas sohte dipe men nan eh memeir nan imwe! Eri met, I pahn ikih mehlahn ohl menet oh pahn koakoa kumwail sang pohn sampah!” ¹² Depit eri koasoanehdi, nah ohl ako ahpw kemehla Rekap oh Paana oh lupukasang pehra ko oh nehra ko, oh langahda limwahn pwarero nan Epron. Re ahpw ale moangen Isposed oh sarepedi nan en Apner sousou nan Epron.

5

Depit Wiahla Nanmwarkien Israel oh Suda (1 Kronikel 11.1-9; 14.1-7)

¹ Kedekedeo, kadaudok en Israel koaros ahpw pwarala rehn Depit nan Epron oh patohwanohng, “Iet kiht kisehmwi kei. ² Eri, mahso, ni mwehin Nanmwarki Sohl, komwi me kin kakaun mehn Israel kan ni ar kin mahwen, oh KAUN-O ahpw ketin mahsanihong komwi me komwi me pahn wia sounkaweid en sapwellime aramas akan oh kin kakaun irail.” ³ Eri, kaunen Israel koaros ahpw iang patopene pahn kupwur en Nanmwarki Depit nan Epron. Irail oh Depit eri wiahda inou ehu nanopwungarail mwohn silangin KAUN-O; re

ahpw keiehdi Depit pwe en wiahla nanmwarkien Israel. ⁴ Eri, Depit sounpar 30 ahnsou me e ketin wiahla nanmwarki, oh e wia kaun emen erein sounpar 40. ⁵ Nan Epron e ketin wia nanmwarkien Suda erein sounpar isuh elep, oh nan Serusalem e ketin wia nanmwarkien Israel pwon oh pil Suda erein sounpar 33.

⁶ Eri, Nanmwarki Depit oh sapwellime sounpei ko ahpw ketilahng mahweniong Serusalem. Eri, mehn Sepus kan me kin kousoan Serusalem ni ahnsowo re ahpw lemeleme me Depit sohte kak kalowehdi kahnimwo. Ihme re patohwankihong, “Komw sohte mwahn kak ketilongodo met. Me maskun kan oh nehtuk kan pahn kapweiengkomwihi.” ⁷ (Ahpw Depit kalowehdi kahnimw kehlail Saion, wasao eri wiahla Kahnimw en Depit.)

⁸ Eri, rahno Depit ahpw mahsanhong sapwellime sounpei ko, “Mie emen rehmwail me kailongki mehn Sepus kan duwehte ngehi? Mie me kak kemeiraila? Ma mie, a en kohdahwei nan pwoaren paipen pihlo oh mahweniong me maskun oh nehtuk ko.” (Iei kahrepel lepin mahsen lepo: “Me maskun kan oh me nehtuk kan sohte kak pedolong nan tehnpas en KAUN-O.”)

⁹ Mwurin Depit eh kalowehdi kahnimw kehlailo, e ahpw kousoanla ie oh ketikihong ede “Kahnimw en Depit.” Ih eri ketin kapilkipene kahnimw, tepida sang ni wasa me sahpwo ilehda ie lellahng ni palikapi en dohlo. ¹⁰ E ahpw kin

5:4: 1 Nan. 2.11; 1 Kron. 3.4; 29.27. **5:6:** Sos. 15.63; S.K. 1.21.

ketin rosorosonla ahnsou koaros, pwehki KAUN-O Koht, Wasa Lapalap, eh kin ketin ieiang.

¹¹ Eri, Airam, nanmwarkien Dair, ahpw poaronelahng Depit meninkeder kei; oh pil ketikihong tuhke sidar kei, iangahki sounkou ihmw kei, oh pil sounwia takai kei, pwe re en kauwada tehnpe. ¹² Depit eri mwahngihikhda mepwukat me KAUN-O ketin kupwurehla en wiahla nanmwarkien Israel, oh pil ketin kapaiahda sapwellime wehio pwehki mehn Israel kan.

¹³ Eri, mwurin eh ketsang Epron, Depit ahpw pil ketin pekehikhida lih ekei. E pil sapwellimanikhida pil ekei pwutak oh serepein. ¹⁴ Eri, iet seri kan me ipwidiong reh nan Serusalem: Sammua, Sopap, Nadan, Solomon, ¹⁵ Ipar, Elisua, Nepek, Sapia, ¹⁶ Elisama, Eliada oh Elipelet.

*Depit Kalowehdi mehn Pilisdia kan
(1 Kronikel 14.8-17)*

¹⁷ Mehn Pilisdia kan eri rongada me Depit kesepwildahr wiahla nanmwarkien Israel, irail koaros ahpw mwekidida pwe re en uhwong oh kalowehdi. Eri, ni Depit eh karongehda met, e ahpw ketila wasahn ruk kehlail kis oh ketiket ie.

¹⁸ A mehn Pilisdia ko ahpw lellahng nan Wahun Repaim oh ikiparpeseng wasao. ¹⁹ Depit ahpw ketin kalelapak rehn KAUN-O, patohwan, “I en patohwan mahweniong mehn Pilisdia kan? Komw pahn ketin kupwurei ie, pwe I en kaloweiraildi?”

KAUN-O ahpw ketin sapeng, mahsanh, “Kohla mahwen, pwe I pahn seweseiuk pwe ke en kaloweiraildi.”

²⁰ Depit eri ketilahng Paal Perasim oh kalowehdi mehn Pilisdia ko wasao. Ih eri patohwan, “KAUN-O ketin kauwehla ei imwintihti kan rasehng lapake laud ehu.” Iei me wasao adanekihlahki Paal Perasim.^a ²¹ Mehn Pilisdia ko eri kesehla sansal takaien dikedik en ar eni kan wasao; Depit oh sapwellime sounpei ko ahpw ketikihda.

²² Mehn Pilisdia ko pil pwuralahng nan Wahun Repaim oh pwurehng ikiparpeseng ie. ²³ Depit pil pwurehng patohwan kalelapak rehn KAUN-O. KAUN-O ahpw ketin sapeng, mahsanih, “Ke dehr mahweniong irail sang wasaht, a pidekla mwurirail, ke ahpw pahn mahweniong irail sang limwahn welin tuhke palsam kan. ²⁴ Eri, ni omw pahn rong ngilen aluweluwen mehmen me ketiketseli pohn kadok en tuhke kan, onopada pwe ke en ruwese mahweno; pwe met wehwehki me I tiengehr mwohmw pwe I en kalowehdi karis en mehn Pilisdia kan.” ²⁵ Depit eri kapwaiada me KAUN-O ketin mahsanih; e ahpw pwakihala mehn Pilisdia ko sang Kepa lellahng Keser.

6

Kohpwahn Inowo Wisikdohng Serusalem

¹ Eri, Depit ahpw ketin pwurehng kapokonepene sounpei pilipil kan en Israel; irail me 30,000. ² E ahpw kahreiraillahng Paala nan wehin Suda, pwe re en ketikihdo sang wasao Kohpwahn Inowo me mwarasang KAUN-O,

^a **5:20:** PAAL PERASIM: Lepin mahsen wet ni Ipru wehwehki “Kaunen kiedpeseng.”

Wasa Lapalap, me mwoale mi pohnangin kerup^b riemen. ³ Irail eri koasoanediong pohn kuruma kapw ehu oh wahsang ni imwen Apinadap me mi pohn dohl ehu. Ussa oh Ahio, nein Apinadap pwutak riemen, ira me kawekaweid kurumao, ⁴ oh Ahio me alu mwowe. ⁵ Eri, Depit oh mehn Israel ko koaros ahpw kin kahkahlek oh kokoul uwen ar kak, kapikapinga KAUN-O. Re ahpw pil kesekesengki neirail arp, lair, aip, kasdanet oh simpal kan.

⁶ Eri, ni ar lel ni en Nakon eh wasahn kamwakelehsang dipwen wahntuhke kan, kouwol ko ahpw dipekelekel. Ussa eri kapahla peho pwe en kolada Kohpwao. ⁷ Ni ahnsowohte engieng en KAUN-O Koht ahpw lellohng Ussa oh kemehla pwehki eh sohte wauneki kohpwao. Ussa eri mehla wasao limwahn Kohpwahn Inowo, ⁸ iei me wasao adanekihlahki Peres Ussa^c lel rahnwet. Depit inenen lingeringerda pwehki KAUN-O eh ketin engiengda pahn Ussa oh kaloke.

⁹ Depit eri lemmwkihla KAUN-O; e ahpw patohwan, “Ia duwen ei pahn walahng rehi ahnsou wet Kohpwahn Inou wet?” ¹⁰ Ih eri kupwurehda en dehr ketikilahng nan Serusalem, ahpw en kapwurupwuralahng ni imwen Oped Edom, me sang kahnimw Kad. ¹¹ Eri, Kohpwao ahpw mihmihki wasao sounpwong siluh. KAUN-O eri ketin kupwuramwahwiha Oped Edom oh eh peneinei.

^b **6:2:** KERUP: Tehk nan kawehwehpen lepin mahsen kan. **6:2:** Eks. 25.22. **6:3:** 1 Sam. 7.1-2. ^c **6:8:** PERES USSA: Lepin mahsen wet ni Ipru wehwehki “Kalokepen Ussa.” **6:11:** 1 Kron. 26.4-5.

¹² Nanmwarki Depit eri karongehda me KAUN-O ketin kupwuramwahwihala Oped Edom oh eh peneinei oh pil mehkoaros me e ahneki, pwehki Kohwahn Inowo. Ihme e ketikihsangki ni imwen Oped oh ketikilahng Serusalem ni kapar lapalap ehu. ¹³ Irail me weuwa Kohpwahn Inowo wia ewen kahk weneu re ahpw uhdi, a Depit ahpw meirongkikhong KAUN-O kouwol men oh koupwul wol mworourou men. ¹⁴ E ahpw ket nan likoutei linen oh kahkahlek uwen e kak, kapikapingga KAUN-O. ¹⁵ Ih duwen ih oh mehn Israel ko ar ketikilahng Serusalem Kohpwahn Inowo, ngisingiski ar peren oh pepeuk neirail sowi kan.

¹⁶ Eri, ni ar weuwa Kohpwahn Inowo kohlong nan kahnimwo, sapwellimen Sohl serepein, Maikal, usuwerieila nan wehnimwtok ehu oh kilangada Nanmwarki Depit eh wie kahkahlek oh lusulusseli mwohn Kohpwao. Serepeino eri nsen-suwedkihla kowahlap. ¹⁷ Irail eri wahlong Kohpwao oh koasoanehdi nan dewe nan Impwal me Depit ketin kauwada pwe Kohpwao en mi loale. Ih eri wia meirong isihs oh meirong en kaminimin ong KAUN-O. ¹⁸ Eri, ni eh ketin kaerala wiepen meirong ko, e ahpw kapaiahda aramas ako ni mwaren KAUN-O, Wasa Lapalap ¹⁹ oh nehkohng irail koaros kisin mwenge ko. E ketikihda ehuehu lopwon en pilawa oh ekis uduk leu, oh pil keik kei ong emenemen ohl oh lih nan Israel. Irail eri kohkohpeseng.

²⁰ Eri, Depit ahpw ketiketlahng ni tehnpeseso pwe en rahnmwahwih sapwellime peneinei; a Maikal, sapwellimen Sohl serepein, ahpw

kohieila pwe en tuhwong. Eri, serepeino ahpw patohwanohng, “Rahnwet namwarkien Israel ketin kalowediong pein ih mwar lapalap ehu, ni eh ketin kasalehda eh mwomwen iahkalahr mwohn mesen serepein lidu en sapwellime soumas akan!”

²¹ Depit ahpw ketin sapeng, mahsanih, “I kahkahlekihong KAUN-O, me ketin piliehda pwe I en wiliandi omw pahpao oh eh peneinei pwe I en kaunda sapwellime aramas en Israel kan. Oh I pahn kin kahkahlek pwe I en kin kawauwihala KAUN-O, ²² oh kahdsuwedihala pein ngehi. Mwohn mesemwen ele kaidehk ngehi mehkot, ahpw serepein ko me ke ndindahn, re uhdahnn pahn kesempwalkin ie mehlel.”

²³ Eri, Maikal, sapwellimen Sohl serepein, sohte nainekihda seri men.

7

En Nadan Kokohp ong Depit (1 Kronikel 17.1-15)

¹ Eri, soahng koaros ahpw soanamwahula nan sapwellimen Depit wehi, oh KAUN-O ketin kup-wurehki ih meleilei sang rehn sapwellime imwintihi kan koaros. ² Nanmwarki Depit eri mahsanihong soukohp Nadan, “Kilang, I kin koukousoan nan ihmw me wiawikhida sidar, a sapwellimen Koht Kohpwahn Inowo kin ketiket nan impwal!”

³ Nadan ahpw sapeng, patohwan, “Eri, maing, komw ketin wiahda dahme komw ketin kup-wurki, pwe KAUN-O ketin ieiang komwi.” ⁴ Eri, nipwongohte KAUN-O ketin mahsanihong Nadan, ⁵ “Kohwei oh kairehki ei ladu Depit, ‘Kaidehk

kowe me pahn kauwadahng ie tehnpesei wasa I pahn kin kousoan ie. ⁶ Sang ni rahn me I kahluwahdo mehn Israel kan sang Isip lel rahnwet, I sohte kin kousoan nan tehnpas, ahpw I kin iang seiseiloakseli; I kin kousoan nan impwal. ⁷ Ni ei kin iang mehn Israel kan seiseiloak, I sohte mwahn idek rehn kaun akan me kin apwahpwalih kadaudok kan dahme re sohte kauweki-dahng ie ehu tehnpas me wiawihkihda sidar.' ⁸ Eri, ke pahn ndaiong ei ladu Depit me ngehi, KAUN-O, Wasa Lapalap, mahsanih, 'I ketikihsang uhk nan sahpw, wasa me ke kin apwahpwalih ie pelin sihpw kan, pwe ke en wiahla kaunen nei aramas en Israel. ⁹ I kin ieiang uhk wasa koaros me ke kin kohla ie, oh kalowehdi omw imwintihi kan koaros. I pahn kasapwiluhkada pwe ke en lapalapala duwehete kaun me keieu lapalap kan nin sampah. ¹⁰⁻¹¹ I ahpw pilohng nei aramas en Israel kan sahpw ehu me re pahn kousoarla ie; oh sohla me pahn kin kedirepwe irail. Sang ahnsou me re pedolong ong nan sahpw wet, aramas loallap suwed kei kin mahmahweniong irail, ahpw soahng wet solahr pahn wiawi sang met kohla. I inoukihda me I pahn kin kasilehsang uhk rehn omw imwintiht kan koaros, oh kihong uhk kadaudokomw. ¹² Eri, ni omw pahn mehla oh seridi rehn omw pahpa kahlap akan, I pahn kasapwilada emen kadaudokomw kan pwe en wiahla nanmwarki oh kakehlakahla sapwellime wehi. ¹³ Ih me pahn kauwadahng ie tehnpas ehu, oh I pahn katengehdi mwoale pwe kadaudoke

7:12: Mel. 89.3-4; 132.11; Sohn 7.42; Wie 2.30.

kan en kin kakaun poatopoat. ¹⁴ I pahn wiahla seme, oh e pahn wiahla nei pwutak. Ma e pahn kin sapwungala, I pahn kin kapwungala duwehte paahpa men eh kin kapwungala nahio. ¹⁵ Ahpw I sohte pahn kadohwanla sang reh ei kalahngan duwehte me I wiahiong Sohl, ni ei sikenla pwe ke en kak wiahla nanmwarki. ¹⁶ Eri, kadaudokomw kan pahn kin mihmihete, oh omw wehi pahn poatopoat kohkohlahte. Oh sapwellimomwi mwehi sohte pahn imwisekla.’”

¹⁷ Nadan eri patohwanohng Depit mehkoaros me Koht ketin kasalehiong ih.

Sapwellimen Depit Kasakas en Kapingkalangan

¹⁸ Nanmwarki Depit eri patohla nan Impwal me KAUN-O kin ketiket loale, e ahpw patohdi oh kapakap, patohwan, “Maing KAUN, ei Koht, iet ngehi sapwellimomwi ladu me sohwar mehlel komwi en ketin kupwurehkin ie mehkoaros me komw ketin wiahiong ie de ei peneinei. ¹⁹ A komw pil ketin kupwukupwure iehte, Maing KAUN, ei Koht, komw ketin inoukihda kapaipen kadaudokei kan ni ahnsou kan me pahn kohdo. Komwi ahpw pil ketin kasalehiong mehpwukat aramas akan, Maing KAUN, ei Koht. ²⁰ Dahme I pil kak patohwanohng komwi? Maing, komw ketin mwahngih ie, sapwellimomwi ladu menet. ²¹ Komwi me ketin wiahda me kapwuriamwei pwukat koaros sang ni pein kupwuromwi, oh komwi ahpw pein ketin kasalehiong ie. ²² Ia uwen sapwellimwomwi roson, Maing KAUN, ei Koht. Sohte me duwehte

7:14: Mel. 89.26-27; 2 Kor. 6.18; Ipru 1.5.

7:16: Mel. 89.36-37.

komwi; sohte pil emen Koht likin komwi, duwen me se pein rongehr. ²³ Sohte ehu wehi nin sampah mie duwehte sapwellimomwi wehin Israel, me komwi ketin kamaiawahda pwe en uhdahn wiahla sapwellimomwi. Komwi ketin kalaudehla mwaromwi, ni omwi ketin wiahiong tohn omwi wehi manaman lapalap oh kapwuriamwei kei, oh ketin kamwomwala wehi kan oh ar koht kan mwohn mesen sapwellimomwi aramas akan, me komw ketin kapitasang Isip pwe re en wiahla sapwellimomwi wehi. ²⁴ Komw ketin sapwellimanikihla mehn Israel kohkohlahte, oh Maing KAUN, komw ketin wiahla ar Koht.

²⁵ “Eri, Maing KAUN, ei Koht, komw ketin kapwaiada inowo me komw ketin wiahiong ie oh ei peneinei kohkohlahte; Maing, komw ketin kapwaiada. ²⁶ Eri, mwaromwien pahn lingalingkihla kowahlap kohkohlahte; oh aramas koaros pahn kin kapunga komwi, patopatohanwan, ‘KAUN, Wasa Lapalap, iei ih me Koht en Israel!’ Oh komwi me pahn kin ketin kolokol kadaudokei kan pwe re en kin wiewia nanmwarki kohkohlahte. ²⁷ Maing KAUN, Wasa Lapalap, Koht en Israel! Pwehki omwi ketin kasalehiong ie met, sapwellimomwi ladu menet, ni omwi mahsanih me komw pahn ketin kolokol kadaudokei kan en nanmwarki kohkohlahte, ihm I patohwan aimahkihda oh patohwan wiahiong komwi pekipek wet.

²⁸ “Eri, Maing KAUN, ei Koht, komwi me uhdahn Koht. Komwi kin ketin kapwaiada sapwellimomwi mahsen kan, oh komwi ketin inoukhongieier soahng kapwuriamwei pwukat.

²⁹ Komwi pil ketin kupwuramwahwih met kadaudok en sapwellimomwi ladu menet, pwe re en kin dadaurete nan omwi kalahngan. Maing KAUN, ei Koht, komwi ketin inoukidahr mepwukat; eri, sapwellimomwi kupwuramwahu en ieiang kadaudokei kan kohkohlahte.”

8

*En Depit eh Wiewia kan en Powehdi
(1 Kronikel 17.16-27)*

¹ Ahnsou ehu mwuri, Nanmwarki Depit pwurehng mahweniong mehn Pilisdia kan oh kaloweiraildi oh ketikihsang irail manaman en kakaun sahpwo. ² E ahpw pil kalowehdi mehn Mohap kan. E kaunediong me lohdi kan nanopwel e ahpw kin kemehla riemen sang ni irek en silimen koaros. Eri, mehn Mohap ahpw wiahla sapwellime aramas oh irail kin pwainohng daksis.

³ Mwuhr e ahpw pil kalowehdi nanmwarkien Sopa nan Siria, Adadeser nein Rehop, nindokon Adadeser eh ketket kolahng onesapahl sapwellime manaman pohn sahpw ni palipowehn Pillap Iupreitis. ⁴ Depit kalowehdi soundak oahs kid isipwiki oh sounpei alu rianen. E koledi uwen oahs me itarohng wa werennansapw epwiki a e kauwehla nehn oahs teikan koaros.

⁵ Ahnsou me mehn Siria sang Damaskus kadarala karis ehu mehn sewese Nanmwarki Adadeser, Depit ahpw mahweniong kariso oh kemehla sounpei rianen riekid. ⁶ Mwuhr e ahpw kauwada impwal en sounpei kei nan sapwarailo, re ahpw wiahla sapwellime aramas oh kin pwainohng

daksis. KAUN-O ketin kupwurehla Depit pwe en powehdi wasa koaros. ⁷ Depit kalowehdi mehn sansar kohl me sapwellimen Adadeser lapalap akan kin weuwa oh walahng nan Serusalem. ⁸ E pil ketiki kohla uwe ehu en prons sang Peda oh Perodai, kahnimw kei me Adadeser kaunda.

⁹ Toi, nanmwarkien Amad karongehda me Depit kalowehdi karis koaros en Nanmwarki Adadeser. ¹⁰ Ih eri kadarala sapwellime pwutak Soram rehn Depit pwehn rahnmawahwi oh kapingahki eh powehdi Nanmwarki Adadeser, me pak tohto kin mahweniong Toi. Soram kadarala rehn Depit kisakis kei me wiawihki-hda kohl, silper, oh prons. ¹¹ Nanmwarki Depit eri kasarawihong kisakis pwukat ong mehn doadoahk ni kaudok, iangahki kohl oh silper kan me lohdi sang wehi kan me e kalowehdi—¹² Edom, Mohap, Ammon, Pilisdia, oh Amalek—pil iangahki dipwisou kei me lohdi sang rehn Adadeser.

¹³ Depit eri ndandla mehlel ni ahnsou me e pwurasang wasa me e kemehla ie mehn Edom nen welikid nan Wahun Soahl. ¹⁴ E ahpw kauwada impwalen sounpei kei nan Edom, oh aramas en wasao ahpw wiahla sapwellime. KAUN-O ketin kupwurehla Depit pwehn kalowehdi wasa koaros.

¹⁵ Depit kaunda Israel pwon oh ketin koasoane-hdi pwe aramas koaros en sapwellime wehi en kin ale wahu oh pwuhng ahnsou koaros. ¹⁶ Sohap me eh nohno Seruaia, iei ih me kaunen karis; Seosopat nein Ahilud me wia kaunen palien pwuhk; ¹⁷ Sadok nein Ahidup oh Ahimelek nein

Apaiadar me wia samworo; Seraia me sounnting en nan tehnpaso; ¹⁸ Penaia nein Sehoiada me kaunen silepen Depit; oh nein Depit pwutak ko me samworo.

9

Depit oh Mepiposed

¹ Rahn ehu Depit ahpw keinemwe, “Mie kisehn peneineien Sohl me momourte? Ma mie, a I men kadekohng oh apwalih pwehki Sonadan.”

² Eri, ahnsowo mie en peneineien Sohl ar ladu men, ede Sipa; e ahpw pehkiekdohng rehn Depit. Nanmwarki Depit ahpw keinemwe reh, “Ih kowe Sipa?”

A e sapeng, patohwan, “Ei maing, sapwellimomwi ladu ngehi.”

³ Nanmwarkio ahpw keinemwe, “Mie kisehn peneineien Sohl me momourte me I kak sewese oh apwalih, duwen me I inoukihong Koht?”

Sipa ahpw sapeng, patohwan, “Mie mehmen me momourte, iei nein Sonadan pwutak; ahpw e nehtuk.”

⁴ Nanmwarkio ahpw mahsanh, “Eri, ia ih?”

Sipa eri sapeng, patohwan, “E patopato Lodepar nan imwen Makir, nein Ammiel.” ⁵ Nanmwarki Depit eri poaronlahng en patohdo reh.

⁶ Ni Mepiposed, nein Sonadan me nein Sohl, eh leledohng mwohn silangin Depit, e ahpw poaridi oh rahnmawahwi. Depit eri mahsanh, “Mepiposed.” A e sapeng, patohwan, “Iet ngehi, sapwellimomwi ladu, maing.”

⁷ Depit ahpw mahsanih, “Ke dehr masak mehkot. Pwe I pahn kadekohng uhk pwehki omw pahma Sonadan. I pahn kapwurehiong uhk sahpw koaros me omw pahma kahlapo, Sohl, sapweniki; oh ke pahn kin iang ie tungoal ni ei tehpel ahnsou koaros.”

⁸ Mepiposed ahpw pwurehng poaridi oh patohwan, “Maing, ngehi me suwedsang kidi mehla men. Dahme komw pahn ketin kupwureiehki?”

⁹ Nanmwarkio eri malipehdo Sipa, sapwellimen Sohl ladu, oh mahsanihong, “I pahn kihong Mepiposed, nein nein omw soumaso nah pwutak, mehkoaros me Sohl oh eh peneinei sapwellimaniki. ¹⁰ Kowe, noumw seri kan, oh omw ladu kan pahn koadoahki sapwen peneineien omw soumaso, oh kihpene wahnsahpwo pwe en kin kamakomour irail. A Mepiposed pahn kin iang ie tungoal ni ei tehpel ahnsou koaros.” (Sipa naineiki pwutak ehk limmen oh ladu riehk.)

¹¹ Sipa eri sapeng, patohwan, “I pahn kapwaiada mehkoaros me Wasa Lapalap ketin koasoanehdi.”

Mepiposed eri kin iang kepин konot ni tehpel en namwarkio duwehte ma ih emen sapwellime pwutak. ¹² Mie nein Mepiposed kisin pwutak kis, ede Maika. Peneinei koaros en Sipa eri wiahla ladun Mepiposed. ¹³ Eri, Mepiposed me nehtuk, kin koukousoan Serusalem, oh kin kepikepin konot sang nin tehpel en nanmwarki ahnsou koaros.

*Depit Kalowehdi mehn Ammon oh mehn Siria
(1 Kronikel 19.1-19)*

¹ Mwurin ahnsou kis Nahas, nanwmarkien Ammon, ahpw pwoula, oh sapwellime pwutak Anun uhd wiahla nanmwarki. ² Nanmwarki Depit ahpw mahsanh, “I pahn kasalehiong Anun ei loalopwoat, duwen me eh pahma Nahas kasalehongieier.” Depit eri poaronehla meninkeder kei pwehn kasalehiong sapwellime kupwur toutou pwehki pwoulahn Nanmwarki Nahas.

Ahnsou me meninkeder ko lel Ammon, ³ kaunen mehn Ammon ko patohwanohng ar nanmwarkio, “Komw kupwukupwure me ni kawahupen semomwio me Depit kadarkihdo meninkeder pwukat pwehn kasalehiong komwi duwen eh iang eimwoluhki pwoulahn semomwio? Soh douluhl! E kadarodo meninkeder pwukat pwe re en lipoaroke kahnimwet pwe en kak kalowehdi.”

⁴ Anun eri koledi sapwellimen Depit meninkeder ko, sehkasang apali arail alis ko oh lupukasang arail likou ko lel nan lukope, oh kadariraila. ⁵ Re namenekla pwurala ni imwarail ko. Ni Depit eh karongehda dahme wiawiher, e ahpw pakairkilahng irail re en mihamihte Seriko oh dehpa pwurodo lao arail alis kan pwurehng wosada.

⁶ Mehn Ammon wehwehkier me re kahredahr Depit eh wiahla arail imwintihti, ihme re pwainki-hda sounpei en Siria rianen sang Pedrehop oh Sopa, sounpei nen riepwiki sang Top, oh nanmwarkien Maaka iangahki sounpei kid. ⁷ Depit

karongehda met, e ahpw kadarala Sohap iangahki sapwellime karis pwon pwe re en mahweniong irail. ⁸ Mehn Ammon ko ahpw kohla oh mihami ni ewen kehl kolahng Rappa, arail poahsoan kaun, a meteiko, mehn Siria, Top, oh Maaka, mihami nansapwo.

⁹ Sohap eri kilangada me imwintihti ko pahn kodohng irail sang mwohrail oh mwurirail, ih eri pilada sounpei kehlail en Israel kei oh kihdiong irail sallahng mehn Siria ko. ¹⁰ E ahpw kihdi luhwen nah sounpei ko pwe rie Apisai en kaunda, me kihdiong irail sallahng mehn Ammon ko, ¹¹ Sohap ahpw ndahng, “Ma ke pahn kilang me mehn Siria pahn kaloweiehdi, ke ahpw kohdo oh sewese ie, oh ma mehn Ammon pahn kaloweiuukedi, I pahn kohwei oh seweseiuk. ¹² Kehlail oh kommwad! Kitail pahn kehlail mahwenki neitail aramas akan oh kahnimw kan en atail Koht. Oh kupwur en KAUN-O en pweida rehtail.”

¹³ Sohap oh nah sounpei ko ahpw mwekidla pwe re en mahweniong ar imwintihti ko; mehn Siria eri tangdoau. ¹⁴ Ni ahnsou me mehn Ammon ko kilangada duwen mehn Siria ko ar tangatang kohla, re pil tangasang Apisai oh pweieklahng nan kahnimwo. Sohap eri wekideksang eh mahweniong mehn Ammon oh pwuralahng Serusalem.

¹⁵ Mehn Siria eri esedahr me re lohdier pahn mehn Israel, irail eri likwerihpene neirail sounpei koaros. ¹⁶ Nanmwarki Adadeser ahpw poaronlahng mehn Siria ko me mihami ni palimesehn Pillap Iupreitis, re ahpw patohla Elam; Sopak, kaunen sapwellimen Adadeser, nanmwarkien

Sopa karis, me kaunirailda. ¹⁷ Ahnsou me Depit karongehda duwen met, e ahpw kapokonepene karis en mehn Israel ko, oh kotehla Pillap Sordan oh koasoaneiraildi sallahng mehn Siria ko. Mahwen ahpw tepida, ¹⁸ oh mehn Israel ko ahpw pwakihala mehn Siria ko. Depit oh ienge ko eri kemehla soundak werennansapw en Siria isip-wiki oh soundak oahs pahnen, re pil kauwehla Sopak, kaunen sounpeio, e ahpw mehla nan mahweno. ¹⁹ Ahnsou me nammwarki ko me mi pahn Adadeser mwahngihadahr me re lohdier pahn mehn Israel, re ahpw pekimahk rehrail oh mihla pahn ar manaman. Oh mehn Siria ko masakala sewese mehn Ammon ko sang ni ahnsowo kohla.

11

Depit oh Padsipa

¹ Mwurin sounpar ehu, ni ahnsou me nammwarki kan kin epwehnki mahwen, Depit ahpw poaronehla Sohap, iangahki sapwellime kaunen sounpei ko, oh karis en mehn Israel ko, pwe re en mahweniong mehn Ammon kan. Eri, re ahpw kalowehdi mehn Ammon oh kapilpene ar kahn-imw Rappa. A Depit ketikette Serusalem.

² Eri, rahn ehu, Depit ahpw kipada sang sapwellime seimwok en souwas oh ketiketseli wasahn luaruhru pohn tehnpeseo. Nindokon eh ketiketseli wasao, e ahpw mwahngihada lih emen me wie duhdu. Liho inenen masamwahu. ³ Depit eri poaronehla sapwellime meninkeder men pwe en kalelapak ihs lih meno; e ahpw mwahngihada me Padsipa, nein Eliam, oh en

Uraia, mehn Id, eh pwoud. ⁴ Depit eri ketikidohng liho nan tehnpeseo, e ahpw ketin kepedi reh oh wiahda nsenen pwopwoud. (Liho ahpwtehn kanekehla eh tiahk en kamwakel mwurin eh pwung.) Liho eri kohkohla ni imwe. ⁵ E ahpw diarada me e liseiandahr, ahpw pakairkilahng Depit.

⁶ Depit eri ketin kadaralahng Sohap pakair ehu me mahsanih, "Kadarodohng ie Uraia, mehn Id." Sohap eri kadaralahng Depit Uraia. ⁷ Ni Uraia eh lel rehn Depit, Depit ahpw keinemwe reh duwen iren Sohap, duwen sounpei kan, oh duwen ar mahmahwen. ⁸ Mwuhr, e ahpw mahsanihong Uraia, "Kohwei mahs ni imwomwo oh kommoaldi ekis." Uraia ahpw pwurala, oh Depit ketin kadaralahng ni imweo kisakis ehu. ⁹ Uraia ahpw sohte patolahng ni imweo, pwe e pweidi ni ewen kelen kahnimwo rehn silepen nanmwarki ko. ¹⁰ Eri, ni Depit eh karongehda me Uraia sohte pwurala ni imweo, e keinemwe reh, mahsanih, "Ke ahpwtehn pwurodo sang seiloak reirei ehu; eri, dahme ke sohte kohkihwei ni imwomwo?"

¹¹ Uraia ahpw sapeng, patohwan, "Mehn Israel kan oh mehn Suda wie mahmahwen, oh Kohpwahn Inowo ieiang irail. Ei kaun Sohap oh nah soumas akan kin koukousoan nan impwal pahlalahng. A ia duwen ei pahn patohla ni imweio, ia duwen ei kak tungoal oh nimpil oh wendi rehn ei pwoudo? Ni mwaren Koht nanleng, I kahukihla me I sohte kak wia soahng wet."

¹² Depit eri mahsanih, "Ma ih duwen men, a mihamihte met rahnwet, a lakapw I pahn kapwureukala." Uraia eri mihamihte Serusalem

rahno oh manda sang. ¹³ Depit eri lukeiong pwe en iang kepin konot reh, e ahpw ketin kasakawihala douluhl. Ahpw Uraia sohte pil patohla ni imweo nipwongo; pwe e pil pweidihte nan tehn-paso rehn silepe ko.

¹⁴ Manda sang rahno, Depit ketin ntingihada kisinlikou kis ong Sohap oh ketikihong Uraia pwe en wa kohla. ¹⁵ Iet audepen kisinlikowo: “Khidiong Uraia mwohn karis en sounpei kan wasa me mahwen kehlail ie; eri, kowe oh iengomw kan ahpw pweiekdo sang pwe en lellel oh mehla.” ¹⁶ Eri, nindokon Sohap eh mahmahwenih kahn-imwo, e kadarala Uraia wasa me e ese mahweno inenen kehlail ie. ¹⁷ Karis en imwintihti ko eri kohieisang nan kahnimwo oh peiong nein Sohap karis ko, oh kemehla ekei sapwellimen Depit kaunen sounpei ko. Eri, Uraia pil iang mehla.

¹⁸ Sohap eri mwadangete pakairkilahng Depit duwen mahweno. ¹⁹ E ahpw kehkehlingkikhong meninkedero, “Mwurin omw pahn pakairkihong nanmwarki mehkoaros duwen mahwenet, ²⁰ ele e pahn engiengda oh keinemwe rehmw, ‘A dahme kumwail nohn karaniheki kahnimwo? Kumwail sehse me re kakete kasikihkumwaildi sang pohn kelen kahnimwo? ²¹ Kumwail sohte tamataman Apimelek, nein Kidion, duwen eh kamakamalao? Pwe lih emen nan Depes me kesehdiong powe takaien ngidar pilawa ieu sang pohn kelen kahnimwo oh kemehla. Eri, I ahpw sehse ia kahrepun amwail nohn karanihala kehlo.’ Eri, ma nanmwarkio pahn keinemwe rehmw met, ke ahpw pahn patohwan, ‘sapwellimomwi kaunen soun-

pei Uraia pil iang kamakamala.’ ”

²² Meninkedero eri mjesel kolahng rehn Depit. Ni eh lel reh, e ahpw patohwan kasalehiong mehkoaros me Sohap padahkihong. ²³ E patohwan, “At tungoal imwintihti ko inenen kehlailsang kiht. Re patohieisang nan kahnimwo oh mahweniong kiht nan wasa me mohs, ahpw se patohwan kapweiekiraildi oh nsehniraillahng ni ewen kelen kahnimwo. ²⁴ Iraill ahpw kadardohng kiht neirail kesik ketieu kan sang pohn kelen kahnimwo. Eri, ekei sapwellimomwi kaunen sounpei ko ahpw lellel oh mehla. Sapwellimomwi kaunen sounpei Uraia pil iang kamakamala.”

²⁵ Depit eri mahsanhong meninkedero, “Kohwei oh ndaiong Sohap en dehr nan kapehd tikit-ingkihla apwal wet, pwe sohte me kak ese ihs me pahn mehla nan mahwen. Ndaiong en nantihong eh mahweniong kahnimwo e lao kalowehdi.”

²⁶ Ni Padsipa eh rongada me eh pwoudo melahr nan mahwen, e ahpw mwahieiki. ²⁷ Ahnsoun eh nsensuwed lao eralahr, Depit ahpw ketikidohng nan tehnpeseo, oh likendkihda. Padsipa eri naitikhada pwutak emen. Ahpw KAUN-O kupwursuwedkihla sapwung wet me Depit wiahda.

12

En Nadan Karasaras oh en Depit Koluhla

¹ KAUN-O ahpw ketin poaronehla soukohp Nadan rehn Depit. Nadan eri patohla rehn Depit oh patohwan, “Mie ohl riemen me kin kouousoan nan kahnimw ehu; emen ira me kepwehpwe, a emen me semwehmwe. ² Eri, me kepwehpweo naineki kou oh sihpw tohto, ³ a me semwehmweo naineki sihmpwultehmen, ihte me e pwainda, me e kin apawahpwalih oh kakairada ni imwe mpen nah seri kan. E kin kamwengehki pein eh tungoal kisin mwenge kan, e kin kanimpile sang nan pein nah kepen nimpil kan, oh e kin sikesikekih. E kin wiahki likamwete emen nah serepein. ⁴ Rahn ehu, aramas en keiru men pa leledong ni imwen ohl kepwehpweo. Ohl kepwehpwe menet sohte men kemehla emen nah mahn ako pwe en kamadipwehki aramas en keiruwo; e ahpw kihsang nein ohl semwehmweo nah sihmpwulo, oh kemehla pwe en kamadipwehki mehn keiruwo me mihami ni imweo.”

⁵ Ni Depit eh karongehda met e ahpw engienda kowahlap pahn ohl kepwehpweo oh mahsanihong Nadan, “I kahukihla KAUN-O me ketin ieias, me soangen aramas me wiahda soangen tiahk wet, uhdahn konehng en kamakamala! ⁶ E pahn kapwurehla pahn pak pahieu uwen me e kihsangehro, pwehki soangen tiahk loallap wet me e wiahda.”

⁷ Nadan ahpw patohwanohng Depit, “Iei komwi me aramaso. Oh iet me KAUN-O, Koht en Israel, mahsanih, ‘I kasapwiluhkada en nanmwarkien Israel oh kapituhkala sang rehn Sohl. ⁸ I khong uhk eh wehi oh eh pwoud kan; I wiahk-

inuhkala nanmwarkien Israel oh Suda. Oh ma met sohte itar, I pahn kihong uhk soahng kei me laudsang oh mwahusang pak riepak. ⁹ Eri a, dahme ke mwamwahlkihki ei kosonned akan? Dahme ke wiahkihdahki dihp wet mwohn silangi? Pwe kowe me kemehla Uraia nan mahwen; kowe me mweidohng mehn Ammon kan en kemehla; ke ahpw ale eh pwoud oh pwoudikihda. ¹⁰ Iei me, erein dih koaros, ekei rehn kadaudokomw kan pahn mehla suwed pwehki omw mwamwahlkiniehla oh kihsang en Uraia eh pwoud oh pwoudikihda. ¹¹ I kahukihla me I pahn kahredohng uhk apwal sang nan omw peneinei. Ke pahn pein kilang met ni ei pahn adihasang uhk omw pwoud kan oh kihong emen tohrohr; e ahpw pahn wiahda rehrail nsenen pwopwoud ni rahn pwe aramas akan en ese. ¹² Pwe ke dipadahr ni rir, ahpw I pahn kapwaiada mepwukat ni sansal mwohn mesen mehn Israel koaros.’”

¹³ Depit eri patohwan, “Iet ngehi aramas dipan emen me dipadahr ong KAUN-O.”

A Nadan ahpw sapeng, patohwan, “KAUN-O ketin mahkohng komwi. Komw sohte pahn sipalla. ¹⁴ Ahpw pwehki omwi ketin kauwehla wahun KAUN-O ni omwi ketin wiahda met, sapwellimomwi serio pahn mehla.” ¹⁵ Nadan eri patopatohla ni imweo.

Sapwellimen Depit Pwutak Mehla

KAUN-O ahpw ketikihong soumwahu laud ehu seri me en Uraia eh pwoudo naitikihong Depit. ¹⁶ Depit eri peki rehn Koht pwe serio en mwahula.

E ahpw sohla konote mehkot, oh nipwong koaros e kin ketilong nan sapwellime pere oh kin poaridiong nan taht wonohn ie. ¹⁷ Sapwellime lapalap akan en tehnpe seo ahpw kin patohla reh oh song en peki en ketida sang nan tahto, ahpw e so mwahn kupwure irail, oh so mwahn iang irail konote mehkot. ¹⁸ Eri, mwurin wihk ehu, serio ahpw mehla, oh sapwellime lapalap ako sohte men patohwan pakairikhong duwen mehlao. Pwe re nda, “Ni serio eh momour, Depit sohte kin ketin sapeng kitail ni atail kin men patohwan lokaiaiong. Ia duwen atail pahn patohwanohng me sapwellime serio melahr? È kakete ketin wiahda mehkot sapwung.”

¹⁹ A ni Depit eh ketin tehkada duwen ar wie mwengmwengininginpene, e mwahngihada me serio melahr. Ih eri keinemwe rehrail, “Dah, serio melahr?”

A re sapeng, patohwan, “Ei maing, e melahr.”

²⁰ Depit eri ketida sang nan tahto, lokipilda, koasoanehda piten tapwi, oh wilianda sapwellime likou kan. Ih eri ketila nan tehnpas en KAUN-O pwe en ketin wia sapwellime kaudok. Ni eh ketin sapahldohng nan tehnpe seo, e mahsanih re en kaunopadahng konote, e ahpw ketidi nin tehpel oh konot. ²¹ Sapwellime lapalap ako ahpw patohwanohng, “Maing, se sohte patohwan wehwehki met. Ni serio eh momour, komw kin ketin tentenihrkì oh kin ketin kaikaisihsol. A met, ni eh melahr, komw ketida oh wie konokonot.”

²² Depit ahpw ketin sapeng irail, mahsanih, “Ei, mehlel; I kaisihsol oh sengiseng nindokon serio eh momour; pwe I kihkikhong me KAUN-O pahn ketin

kupwuramwahwih ie oh sohte mweidohng serio en mehla. ²³ Ahpw met, ni eh melahr, dahme I pahn kaisihsolki? Kak I en kapwurehiong mour rehn serio? Ehu rahn I pahn kohla reh, ahpw ih e sohte mwahn kak kohdo rehi.”

Ipwidien Solomon

²⁴ Depit eri ketin kansenamwahwihala eh pwoud Padsipa. E ahpw tuhwong oh wiahda nsenen pwopwoud. Liho eri naitikhada pwutak emen, me Depit ketikihong ede Solomon. KAUN-O ahpw ketin loalloale kisin pwutako, ²⁵ oh mahsanhong soukohp Nadan en kihong eden pwutako Sedidaia,^d pwehki KAUN-O eh ketin loalloale.

Depit Kalowehdi Rappa

(1 Kronikel 20.1-3)

²⁶ Sohap usehla mahweniong Rappa, poahsoan kaunen Ammon, oh e kerenieng kalowehdi. ²⁷ E ahpw kadaralahng Depit meninkeder kei, patohwan, “I mahweniong Rappa oh kalowehdi arail wasahn nahk pihl. ²⁸ Met komwi ketikipene luhwen sapwellimomwi karis kan, oh mahweniong kahnimwo pwe pein komwi en kalowehdi, pwe I sohte men ale kapingpen lohdi en kahnimwo.”

²⁹ Depit eri ketikipene sapwellime karis ko oh mahweniong Rappa oh kalowehdi. ³⁰ Depit ketikihsang mwaramwar kohl ehu pohn moangen koht Molek, dikedik en eni en mehn Ammon kan, me toutouki kerenieng paun isihsek limau oh kisin

^d **12:25:** SEDIDAIA: Ahd wet ni mahsen en Ipru wehwehki “KAUN-O ketin loalloale.”

takai kesempwal mi loale. Depit ale takai kesempwalo oh wiahkihda mware. E pil ketikihda dipwisou lohdi kei sang ni kahnimwo ³¹ oh ketiki-hong tohn wasao re en doadoahngki rasaras, kua, oh sile, oh itonehng irail re en wiahda takain kou ihmw. E pil wiahiong soahingohte ong tohn kahnimw teikan en Ammon. Ih oh sapwellime sounpei kan ahpw pwuralahng Serusalem.

13

Amnon oh Damar

¹ Sapwellimen Depit pwutak, Apsalom rianeki serepein men me sohte pwopwoud, e inenen kaselel, oh ede Damar. Amnon, pil emen sapwellimen Depit pwutak, inenen men pwoudiki-hda serepeino. ² Eh limpoak inenen laud mehlel ong serepeino, kahrehdah eh soumwahukihda pwehki eh apwal ong ih en kak pwoudiki, pwehki serepeino meipwon oh sohte kin tuhwong ohl. ³ Mie kompoakepahn Amnon men me inenen mwuerswed, ede Sonadap, nein rien Depit pwutak, Samma. ⁴ Sonadap eri ndahng Amnon, “Sapwellimen nanmwarki pwutak kowe, I ahpw kin kilikilang omw kin mwomwen nsensuwed rahn koaros. Dahme kahrehda?”

A Amnon sapeng, nda, “Pwehki ei nohn poakepoake Damar, rien Apsalom me at pahpa metehmen.”

⁵ Sonadap ahpw ndahng, “Kohla wendi oh mwomwehda me ke soumwahu. Ni ahnsou me omw pahpa pahn ketido pwehn tuhwong uhk, a ke pahn ndahng, ‘Komw kupwurkalahngan oh mahsanhong riei serepein Damar en patohdo

mahs kamwenge ie. I mwahuki en koasoanehdi kisin tungoal akan wasa I kak kilang ih ie, oh en pil pein katungoale ie.’”⁶ Amnon ahpw mwomwehda me e soumwahudahr; e ahpw kohla wendi nan eh pereo.

Nanmworki Depit ahpw ketila pwehn mahnih, a Amnon patohwanohng, “Komw kupwurkalahngan mweidohng Damar en patohdo oh wiahda ekei keik en wasaht, wasa I kak kilang ih ie, oh en pil pein katungoale ie.”

⁷ Depit eri poaronlahng Damar nan tehnpas pwe en patolahng ni imwen Amnon oh wiahda eh kisin tungoal.”⁸ Damar ahpw patohla oh diarada Amnon nan eh wasahn meir. E ahpw ale pilawa, oh wiahda keik kei wasa me e kak kilikilang ih ie. Mwuhr e ahpw kukihada⁹ oh kihsang nan piraino oh kihong pwe en tungoale, ahpw e sohte men tungoale. E ahpw ndahng, “Ndahng koaros me mihami met re en pedoisang wasaht”—irail eri pedoi. ¹⁰ Ih eri ndahng Damar, “Wahdo mahs keik kan ni ei pehtet oh menlau pein katungoale ie.” Damar eri ale keik ko oh walahng reh. ¹¹ Ni serepeino eh wahla keik ko e ahpw poarohngete koledi, oh ndahng, “Menlau wendi rehi!”

¹² A Damar ndalahng, “Soh, ke dehr itonehng ie I en wia soangen tiahk suwed wet! Dihp lapalap ehu men. ¹³ Ia duwen ei kak uh nanopwungen aramas akan? Oh kowe—ke uhdahn pahn adsuwedla nan Israel. Menlau lokaiaiong nanmworkio, oh I ese me e pahn ketin mweidohng uhk ngehi. ¹⁴ Ahpw e sohte men rong Damar, oh nan eh kehlailsang serepeino, e ahpw angkehlailiong.

¹⁵ Amnon eri direkihla eh kailongki serepeino; e kailongkihla Damar laudsang limpoak me e wiahiong mahso. E ahpw ndalahng, “Pitipit kohkohwei sang met!”

¹⁶ A serepeino sapeng, nda, “Ni omw pahn kausiehla nin duwe met ke pahn wiahda sapwung laud ehu me laudsang me ke ahpwtehn wiahda!”

Ahpw Amnon sohte men rong serepeino; ¹⁷ e ahpw ekerodo nah sounpapaho oh ndahng, “Wah-wei sang lih menet mwoshi! Kumwail kesehieiwei oh lokehdi perehn!” ¹⁸ Papaho eri wahieisang Damar loaleo oh lokehdi pereho.

Damar likawih likou reirei ehu me peh reirei, me meipwon soupeidi en ahnsowo kin likawih. ¹⁹ Serepeino ahpw kamwarehdiong pehs pohn moange oh tehrpeseng eh likou reireio, oh peh ko perekere meseo oh wie sengiseng kohla. ²⁰ Ni ahnsou me rie Apsalom kilangada, e ahpw idek reh, “Amnon wiahiong uhk mehkot suwed? Eri, riei ke dehr nsensuwedki. Pwe kumwa pirien, amwa pahma metehmen, ke dehpa ndahng emen duwen met.” Damar eri mihamihte rehn Apsalom, nsensuwed oh sangasangat. ²¹ Ni ahnsou me Nanmwarki Depit karongehda dahme wiawiher, e ahpw engiengkihda kowahlap. ²² Oh Apsalom inenen kailongkihla mehlel Amnon pwehki eh angkehlailiong rie serepein Damar, e ahpw sohla lokaiaiong Amnon.

Apsalom Dupukohng Amnon

²³ Sounpar riau mwuri, Apsalom pahn sehk nah sihpw ko ni Paal Asor, limwahn kahnimw Epraim, e ahpw luke sapwellimen nanmwarki pwutak ko

koaros re en iang patohdo wasao. ²⁴ E ahpw patohla rehn Nanmwarki Depit oh patohwanohng, “Maing, Wasa Lapalap, I patohwan sesehk ei tungoal sihpw kan. Komwi oh sapwellimomwi lapalap akan pahn kak iang towehda kamadipw wet?”

²⁵ Nanmwarkio ahpw ketin sapeng, mahsanih, “Soh samwa, e pahn wia lapalahn kedirepw ehu ong uhk ma se pahn iang kohwei.” Apsalom wie ngidingidkihte, ahpw nanmwarkio sohte kupwurki, e ahpw mahsanihong Apsalom en patopatohla.

²⁶ Apsalom ahpw patohwan, “Eri, komw kak mweidohng rie i pwutak Amnon en iang patohla?”

Nanmwarkio eri keinemwe reh, “Ia kahrepe?”

²⁷ Ahpw Apsalom wie ngidingidkihte Amnon en iang lao nanmwarkio mweidohng sapwellime pwutak koaros en iang Apsalom patohla.

Apsalom wiahda kamadipw ehu me konehngete nanmwarki men. ²⁸ E ahpw kehkehlingkikhong nah ladu ko, “Kumwail tehk mwahu ni Amnon e pahn sakaula, I pahn ruwese, kumwail kemehla. Kumwail dehr masak. Ngehi me pahn pein pwukoahki met. Kumwail kommwad oh dehr peikasal.” ²⁹ Papah ko eri kapwaiada dahme Apsalom kehkehlingkikhong irail, irail eri kemehla Amnon. Sapwellimen Depit pwutak ko koaros ahpw karadahng pohn wararail ahs ako oh tangdoau.

³⁰ Nindokon ar kohkohla nanialo, pakair ahpw lelohang Depit me ketihtihki, “Apsalom kemelahr sapwellimomwi pwutak ko koaros— sohte emen me luhwehdi!” ³¹ Nanmwarkio ahpw ketida,

oh tehrpeseng sapwellime likou nan eh kupwur toutou, oh pwupwudiong nanopwel. Papah ko me iang pato wasao pil iang tehrpeseng ar likou ko. ³² A Sonadap, nein rien Depit ohl, ede Samma, ahpw patohwan, “Maing, Wasa Lapalap, irail sohte kemehla sapwellimomwi pwutak ko koaros. Amnon kelehpw me mehla. Komw kak kadehde mwomwen Apsalom me e koasoakoasoane soahng wet sang ni rahn me Amnon angkehlailiong rie Damar. ³³ Eri, komw dehr ketin kamehlele rohng wet, me dene sapwellimomwi pwutak ko koaros kamakamalah.”

³⁴ Apsalom eri tangdoaui.

Ni ahnsowohte sounpei me silepen tehnpaso kilangada pokon laud ehu me kohkohdo sang Oronaim. E ahpw patohla rehn nanmwarkio oh patohwanohng ire wet. ³⁵ Sonadap eri patohwanohng Depit, “Ih sapwellimomwi pwutak ko me patopato kohdo, nin duwen me I patohwanohng komwi.”

³⁶ Ni eh ahpwteln kaimwisekala eh pato, a sapwellime pwutak ko pa lella; re ahpw taphada senseng, Depit oh sapwellime lapalap aka pil iang tentenahr kowahlap. ³⁷⁻³⁸ Apsalom eri sopohla oh kohla rehn nanmwarkien Kesur, Talmai nein Ammihud, oh mihmihki wasao sounpar siluh. Depit tentenahrki sapwellime pwutak Amnon ahnsou reirei, ³⁹ ahpw ni eh kaimwisekala eimwolu en mehlahn Amnon, e kupwurohkihla mehlel eh men tuhwong sapwellime pwutak Apsalom.

14

Sohap Koasoanehdi pwe Apsalom en Pwurodo

¹ Sohap ese mehlel duwen Depit eh kupwur pahtouki sapwellime pwutak Apsalom, ² ih eri ileklahng lih loalokong men me kin kousoan Tekoa. Ni liho eh leledo, Sohap ahpw ndahng, “Mwomwehda me ke mihami nan nsensuwed laud; likawihada likoun nsensuwed oh dehr karada pitenmoangomw kan. Mwomwehda me kowe lih emen me mihami nan nsensuwed laud ahnsou reirei. ³ Kowe eri patohla rehn nanmwarkio oh patohwanohng dahme I ndaiong uhk.”

⁴ Liho eri patohla rehn nanmwarkio oh poaridiong nanopwel, patohwan, “Maing, Wasa Lapalap, komw ketin kupwure ie.”

⁵ Nanmwarkio ahpw ketin keinemwe reh, mahsanh, “Dahme ke anahne?”

A e sapeng, patohwan, “Liohdi semwehmwe men ngehi. Ei pwoudo kapilsalehdalahr. ⁶ Eri maing, ei tungoal pwutak riemen, rahn ehu ira ahpw peida nansapw, wasa me sohte me pahn doareirapeseng, emen ira ahpw kemehla emen. ⁷ Eri, met ei peneinei uhwongieier oh ngidingid-khong ie I en patohwanohng irail nei pwutako pwe re en kemehla pwehki eh kemelahr rieo. Ma ar pekipek pahn pweida, I pahn kelehpwla, sohla nei pwutak. Re pahn kauwehla ei koapworopwor oh sohla me pahn kadakadaur eden ei pwoudo.” ⁸ Nanmwarkio ahpw ketin sapeng, mahsanh, “Pwurowei ni imwomwo, ngehi me pahn seweseiuk pwukoahki ire wet.”

⁹ Liho ahpw patohwan, “Maing, Wasa Lapalap, mehkoaros me komwi pahn ketin wia, ngehi oh

ei peneinei me pahn pwukoahki; komwi oh omwi peneinei sohte pahn iang pidada ire wet.”

¹⁰ Nanmwarkio eri sapeng, mahsanih, “Ma mehmen pahn men kauweikomwihla, a ke pakairkhong ie, e ahpw pahn sohla kedirepweiuk.”

¹¹ A liho patohwan, “Wasa Lapalap en ketin loulouki ong sapwellime Koht, pwe ei peneinei me ahneki pwukoahn ikih melahn nei pwutako re en dehr wiahda ehu dihp me pahn laudsang kamakamalahn nei pwutak teio.”

Depit ahpw sapeng, mahsanih, “I inoukihda ni mwaren Koht me ketin ieias, me noumw pwutako sohte pahn diar apwal.”

¹² Liho ahpw pil patohwanlahng, “Maing, Wasa Lapalap, komwi pil ketin mweidohng ie I en pil pato.”

E sapeng, mahsanih, “Nna pato.”

¹³ Liho eri patohwanohng, “Dahme komwi ketin wiahkikhong soangen sapwung wet ong sapwellimen Koht aramas akan? Komwi sohte mweidohng sapwellimomwi pwutako en pein pwurodo sang eh kalipilipala, eri, pein komwi ketin kadeingkomwidahr nin duwen dahme komwi ahpwtehn mahhsanih. ¹⁴ Kitail koaros pahn kapilsalehdala, kitail rasehng pihl me wudekiong nanpwel me sohte kak en pwurehng rikirikpene. Koht pil sohte kin ketin kapwuredohng me melahr akan nan mour wet, ahpw nanmwarki kak ketin kasapahldo aramas emen me kalipilipala. ¹⁵ Eri, maing Wasa Lapalap, kahrepenei patohdo rehmwi, pwehki aramas akan kasaloweiedahr, I ahpw

mengimengloalki me I pahn patohdo pahn kupwuromwi ni koapworopwor me komwi pahn ketin kapwaiada dahme I pahn peki. ¹⁶ I medemedewe me komwi pahn ketin karonge ie oh kapitiesang ih me songosong en kemehla ngehi oh ei tungoal pwutako oh adihasang kiht sahpw me Koht ketikihong sapwellime aramas akan. ¹⁷ Maing, I mengimengloalki me sapwellimomwi inou pahn kapitiehla, pwehki nanmwarki eh rasehng sapwellimen Koht tohn leng oh kak ketin katohrepeseng me suwed oh me mwahu. KAUN-O omwi Koht, en ketin ieiang komwi!”

¹⁸ Nanmwarki ahpw ketin sapeng, mahsanah, “I pahn idek rehmw pweidek pwoat, eri ke uhdahn pahn lokaia mehlel ong ie.”

Liho ahpw sapeng, patohwan, “Wasa Lapalap kak ketin keinemwe rehi soahng koaros.”

¹⁹ Nanmwarkio ahpw ketin keinemwe reh, mahsanah, “Sohap me padahkihong uhk soahng koaros me ke en wia?”

A liho sapeng, patohwan, “Maing, Wasa Lapalap, I kahukihla soahng me sarawi koaros, sohte soahng ehu me I kak wia pwe I en dehr sapeng sapwellimomwi keinemwe. Mehlel, sapwellimomwi lapalap Sohap me padahkihong ie dahme I pahn patohwan. ²⁰ Ahpw e wia met pwehn kapwungala ire wet. Wasa Lapalap me erpit rasehng sapwellimen Koht tohn leng oh pil mwahngih soahng koaros me kin wiawi,”

²¹ Eri mwuhr, nanmwarkio ahpw mahsanahong Sohap, “Eri, I koasoanedier nan kapehdi I en

kapwaiada dahme ke anahnehn. Eri, kohwei oh kahrehdo met mwahnakapw Apsalom.”

²² Sohap ahpw poaridiong nanpwel mwohn silangin Depit oh patohwan, “Koht en ketin kup-wuramwahwi komwi, Wasa Lapalap. Met I patohwan ese duwen omwi ketin kupwurperenkin ie, pwehki omwi ketin kupwurehla ei pekipek.”

²³ Ih eri patopatolahng Kesur oh kahrehdo Apsalom nan Serusalem. ²⁴ Nanmwarkio ahpw ketin koasoanehdi pwe Apsalom en dehr kin kousoan nan tehnspaso, pwe e mahsanih, “I sohte men tuhwong.” Apsalom eri kin koukousoan ni imweo, oh sohte kin pwarala mwohn silangin nanmwarkio.

Apsalom Nanpwungamwahwong Depit

²⁵ Eri, sohte aramas emen mie nan wehin Israel me ndandki eh masamwahu oh paliwaramwahu duwehete Apsalom; sang ni moange lel ni sendin neh. ²⁶ Pitenmoange inenen mosul; pak ehu nan pahr ehu e kin seisei ni eh kin reireila oh toutoula. Toutouwih kin paun limau ni eh kin tenek ni mehntenek en wehio. ²⁷ Eri, Apsalom naineiki pwutak silimen oh serepein men, ede Damar, me inenen masamwahu.

²⁸ Apsalom koukousoanki Serusalem erein sounpar riau, ahpw e sohte mwahn kin tuhwong nanmwarkio. ²⁹ Ih eri iliklahng Sohap, pwe en wiliandi oh tuhwong mahs namwarkio; ahpw Sohap sohte men pwarodo reh. E pil pwurehng ileklahng Sohap, a Sohap pil kahngete pwarodo reh. ³⁰ Eri, Apsalom ahpw ndaiong eh ladu kan, “Kilang, en Sohap eh mwetuvel me mihte limwahn ahiet me wahn parli kan nektehn

dondol. Kumwail kohwei oh isikada.” Ladu ko eri kohlahte isikada mwetuvelo.

³¹ Sohap eri kohla ni imwen Apsalom oh idek reh, “Dahme omw ladu kan wiahkihda soahng wet, isikada ei mwetuvelo?”

³² Apsalom eri sapeng, “Ahki I kadarowohng komwi pakair ehu komwi en ketido pwe komwi en wilianiehdi patohla rehn nanmwarki oh kalelapak, ‘Dahme I kohkihdo sang Kesur, oh dahme I mihmihki met? Pwe e mwahwongete I en mihihite wasao.’” E ahpw pil usehlahte, ketihihki, “I men komwi en kupwure ie oh wia pwe I en kak patowohng pahn kupwur en nanmwarkio; pwe ma I sekenikente nan dipeio, a en ketin kemeiehla.”

³³ Sohap eri patohla rehn nanmwarkio oh patohwanohng mehkoaros. Nanmwarkio eri poaronlahng Apsalom en patohdo reh. Apsalom eri patohla pahn kupwure oh poaridiong mwohn silangi. Nanmwarkio eri kasamwo oh metik.

15

Apsalom Koasoanehdi en Kahngohdi

¹ Mwurin met, Apsalom ahpw alehda were werennansapw poat, oahs ekei, oh sounpei 50 me pahn kin tieng mwowe. ² E ahpw kin epwehnki sangkenei pwourda oh mihmihseli limwahn ewen kelen kahnimwo. Oh ni aramas emen eh pahn pwarodo wasao me kin men tuhkihong nanmwarki eh pwuhng kan pwe en kin ketin kapwungala, Apsalom kin ekerodo oh idek reh, “Kowe mehn ia?” Eri, ni eh kin sapeng, nda, “Maing, ngehi kisehn ehu kadaudok en Israel,” ³ Apsalom ahpw kin sapeng, ketihihki, “Kilang,

omw koasoi kan me pwung oh inen, ahpw sohte aramas me pahn wiliandi nanmwarki pwe en rong omw kopwung.” ⁴ E ahpw pil kin nda, “I ahpw men ngehi sounkopwung men, me aramas akan pahn kin pwarodo rehi pwe re en rapahki pwungen ar repenpwung kan; pwe I pahn kin nantihong pwe ar kopwung en kin pweida.” ⁵ Eri, ni aramaso eh pahn kin keieng mpe oh poaridi mwowe, Apsalom kin kapahla peho, kolada, oh metik. ⁶ E kin wia met ong mehn Israel koaros me kin pwarodo rehn nanmwarki pwe re en wia kopwung. Iei duwen eh kin men alkeniken pahrail.

⁷ Eri, mwurin sounpar pahieu, Apsalom ahpw patohwanohng Nanmwarki Depit, “Maing, komw ketin kupwure ie, oh ketin mweidohng I en patohla Epron oh kapwaiada inou ehu me I patohwan wiahiong KAUN-O. ⁸ Pwe ni ei patopato Kesur, nan Siria, I patohwan inoukikhong KAUN-O me e pahn ketin kasapahlihielahng Serusalem, I pahn patohwan kaudokiong ih nan Epron.”

⁹ Nanmwarkio eri mahsanhong, “Kohkohwei ni popohl.” Apsalom eri patopatohla Epron. ¹⁰ E ahpw kadarpeseng meninkeder kei rehn kadaudok en Israel koaros, ketihtihki, “Ni amwail pahn rong ngilen sowi, kumwail werda, ketihtihki, ‘Apsalom wialahr nanmwarki nan Epron!’ ” ¹¹ Apsalom eri kahrehda ohl 200 pwe en iang kohkohla sang Serusalem. A re sasairki eh lamalam, iei me re iangkihla ni kapehd mwakelekel. ¹² Eri, nindokon Apsalom eh wiewia eh meirong, e ahpw pil ileklahng Ahidopel, mehn kahnimw Kilo, en pwarodo. Iei ih emen sounkaweid en Nanmwarki Depit. Eri,

koasoandien pelian nanmwarki ahpw laudla, oh iengen Apsalom kan wie tohtohla.

Depit Lipasang Serusalem

¹³ Meninkeder men eri pakairkikhong Depit, patohwan, “Mehn Israel kan kin iangala Apsalom.”

¹⁴ Depit eri mahsanhong sapwellime lapalap ako me ieiang ih nan Serusalem, “Kitail pahn mwadang tangasang nan kahnimwet ma kitail men pitsang Apsalom. Eri, kitail mwadang, pwe ma soh, e pahn lel met oh kaloweikitaildi oh kemehla aramas koaros en kahnimw wet.”

¹⁵ Re ahpw sapeng, patohwan, “Eri, maing, Wasa Lapalap! Se pahn kapwaiada mehkoaros me komw ketin mahsanh.” ¹⁶ Eri, nanmwarkio ahpw mjesel iangahki sapwellime peneinei koaros oh lapalap ako, re ketiketieisang nan kahnimwo, oh sapwellime pekehi ehk me luhwehdi pwe re en sinsile tehnpeseo.

¹⁷ Eri, ni nanmwarkio oh sapwellime aramas ako koaros ar mjeselsang nan kahnimwo, re ahpw ketin uhdi ni ihmw me mi ni imwin kahnimwo.

¹⁸ Sapwellime lapalap ako ahpw pil uh limwah nindokon mehn Kered oh mehn Peled ko alialu kohla mwohrail. Sounpei 600 me iangala nanmwarkio sang Kad pil keidla mwowe.

¹⁹ Nanmwarkio ahpw mahsanhong Idai, ar kaun, “Dahme kumwail ieiangkin kiht? Kumwail pwurala oh iangala nanmwarki kapwo. Pwe kowe mehn liki men, ke lipasang omw wehi. ²⁰ Ahnsou mwotomwotte me ke mihmihki met, dahme ke pahn iangkin kiht? Ngehi I sehse ia wasa I pahn kohla ie. Eri, pwurala oh kahrehla iengomw ko. Oh KAUN-O en ketin kalahngan oh kupwureiuk.”

²¹ Idai ahpw sapeng nanmwarkio, patohwan, “Maing, Wasa Lapalap, ni mwaren KAUN-O I patohwan kahukihong komwi me I pahn patohwan iangkomwihla ahnsou koaros wasa koaros sohte lipilipil me komw pahn ketla ie, mehnda ma pil ketilahng pwoula ieu.”

²² Depit ahpw sapeng, mahsanih, “Eri, me mwahu! Nna, ukuwei!” Idai eri douluhlla iangahki nah sounpei ko oh iengarail kan. ²³ Eri, aramas ako ahpw sengiseng laud ni ahnsou me iengen Depit ko douluhlla. Nanmwarkio eri ketin kotehla piletik en Kidron iangahki sapwellime ko, irail koaros eri ketin kapar ketiketlahng nan sapwtehn.

²⁴ Sadok, samworo men, pil iang irail, oh iangahki mehn Lipai kei me weuwa Kohpwahn Inowo, re ahpw pwilikihdi oh sohte pwurehng pwekada lao aramas koaros kohieisang nan kahnimwo. Samworo Apaiadar pil iang mi wasao.

²⁵ Nanmwarkio eri mahsanihong Sadok, “Kapwurehla Kohpwahn Inowen nan kahnimwo. Ma KAUN-O pahn ketin kupwurei ie, e pahn ketin mweidohng ie ehu rahn I en pwurodo kilang Kohpwahn oh wasa e mihmi ie. ²⁶ Ahpw ma e sohte ketin kupwurei ie—eri, en ketin wiahiong ie dahme e ketin kupwurki.” ²⁷ E ahpw pil ketin usehlahte eh mahsen ong Sadok, “Kilang, pil kahrehda noumw pwutak, Ahimas, oh nein Apaiadar nah pwutak, Sonadan, ni popohl, oh kumwail pwuralahng nan kahnimwo. ²⁸ Eri, I pahn awiawih ni wasahn kot kan ni pillapo nan sapwtehn, I lao ale rohng sang uhk.”

²⁹ Sadok oh Apaiadar eri kapwurehla Kohpwahn Inowo Serusalem oh mihamihte wasao.

³⁰ A Depit ketidahla pohn Nahnhahn Olip wie tentenihir. E sohte ketin kidimki mehkot aluweluwe kan, ahpw tapwi me pweipweidi pwehki eh nsen-suwed. Koaros me pil idawehnla moangarail kan pil iang koaduhpweldi, oh re pil wie sengiseng kohla. ³¹ Eri, ni pakair eh kohieng Depit duwen Ahidopel eh iangala en Apsalom eh pali, e ahpw kapakap, mahsanih, “Maing, KAUN, komw ketin kapingada en Ahidopel eh kaweid kan!”

³² Eri, ni ahnsou me Depit ketin lel pohn kumwen dohlo, wasa me ehu wasahn kaudok mie, kompoakepaho, Usai, mehn Ark, ahpw tuhwong, mi nan kihou oh pwehlte pohn moange.

³³ Depit ahpw mahsanihong, “Ke sohte pahn kak sewese ie ma ke pahn iangiehla. ³⁴ Ahpw ke kak sewese ie ni omw pahn uhwong kaweid en Ahidopel, ma ke pwurowei nan kahnimwo oh ndaiong Apsalom, ‘Maing, iet ngehi me pahn liduwih komwi duwehte ei kin epwehnki liduwih omwi pahma.’ ³⁵ Eri, samworo ko, Sadok oh Apaiadar, ira pahn mihami wasao, oh ke pahn ndaiong ira mehkoaros me ke pahn rong nan tehnpas en nanmwarkio. ³⁶ Neira pwutak ko, Ahimas oh Sonadan, pil iang mihami rehra, oh ke pahn padahkikhong ira rong koaros me ke pahn rong, pwe ira en wadohng ie.”

³⁷ Eri, Usai, kompoakepahn Depit, ahpw pwurala oh lel nan kahnimwo ahnsowohte me Apsalom pil lel wasao.

Depit oh Sipa

¹ Ni Depit eh ketin daulihala ekis kumwen dohlo, Sipa ladun Mepiposed, ahpw tuhwong. E kahre ahs riemen me weuwa lopwon en pilawa 200, keiken wahn wain 100, dundun en wahntuhke 100, oh edin wain ehu. ² Nanmwarki Depit eri keinemwe reh, mahsanih, “Mehnda dipwisou pwukan?”

Sipa ahpw sapeng, patohwan, “Ahs akan, en sapwellimen nanmwarki peneinei, mehn dakadak; a pilawa oh wahntuhke kan, en sapwellimen nanmwarki sounpei kan ar tungoal, oh wainet, pil ar tungoal; re en kin tungoale ahnsou re kin pwangada nan sapwtehn.”

³ Eri, nanmwarkio ahpw pil keinemwe, “Ia Mepiposed, me eh pahtpa kahlap Sohl omw soumas?”

Sipa ahpw sapeng, patohwan, “E patopato Serusalem, pwe e koapworopworkilahr me ahnsou wet mehn Israel kan pahn onehda sapahl wehin eh pahtpa kahlapo Sohl oh kapwurehiong.”

⁴ Nanmwarkio eri mahsanihong Sipa, “Eri, mehkoaros me Mepiposed ahneki met, kowe me pahn uhd ahnekihla.”

Sipa ahpw sapeng, patohwan, “Maing, iet ngehi sapwellimomwi ladu, me patohwan peki en kin diar kalahngan pahn kupwur en Wasa Lapalap ahnsou koaros.”

Depit oh Simei

⁵ Ni Nanmwarki Depit eh ketin lel Pahurim, a emen kisehn Sohl ko, ede Simei, nein Kera, ahpw

patoeisang nan kahnimwo oh peipeinediong Depit kohiei.⁶ E ahpw pil tapihada katekatehki takai Depit oh sapwellime lapalap ako; e sohte katapanki Depit eh ketiket nanopwungen sounsilasil ko.⁷ Simei ahpw kin lahlahwe Depit, ndinda, “Pwulupwulahkewei, pwulupwulahkewei sang met! Kowe sounkam aramas! Aramas loallap suwed!⁸ Komw pirapahla sapwellimen Sohl wehi, a met KAUN-O ketin kalokalokeiuk pwehki peneineien Sohl tohto me ke kemehla. A met KAUN-O ketikihong noumw pwutak Apsalom wehio, a kowe, sounkam aramas, ke milahr nan apwal laud.”

⁹ A Apisai, nein Seruaia, ahpw patohwanohng nanmwarkio, “Maing, Wasa Lapalp, dahme komw ketin mweidohngki kidi menet en lahlahwei komwi? Komw mweidohng ie pwe I en kolahng lupukasang moange.”

¹⁰ Nanmwarkio eri mahsanihong Apisai oh rie Sohap, “Kumwa piseksang. Ma e pahn lahlahwe ie pwehki KAUN-O me mahsanihong, ihs me kak idek dahme e wiewiahki soahng wet?”¹¹ Depit eri mahsanihong Apisai oh sapwellime lapalap ako koaros, “Pein nei pwutak songosong en kemeiehla; eri, dahme kitail pahn pwuriamweik-ihki tiahk en kadaudok en Pensamin menet? Kumwail pweisang, oh mweidohng en lahlahwe, pwe KAUN-O me ketin mahsanihong en wie met.¹² Mweinele KAUN-O pahn ketin mwahngihada ei apwal oh pahn ketin kupwuramwahwihiehla pwehki lahlahwe pwukat.”¹³ Depit oh sapwellime ko eri ketin usehla ar seiloak. Simei pil idawehnla irail, kekeid ni keilen dohlo, wie

lahlahwehte oh katekatehkin irail takai oh pwehl.
14 Nanmwarkio oh sapwellime ko koaros ngirala
 mehlel ni ar ketin lel Pillap Sordan, re ahpw kom-
 moaldi wasao.

Apsalom nan Serusalem

15 Eri, Apsalom oh ienge mehn Israel ko koaros
 ahpw pedolong nan Serusalem, oh Ahidopel
 pil iang irail. **16** Ni ahnsou me Usai, kom-
 poakepahn Depit, tuhwong Apsalom, e ndalahng,
 “Nanmwarki en rosorosonte! Nanmwarki en
 rosorosonte!”

17 Apsalom eri idek reh, “Dahkot mwo, dahme
 ke sohte loalopwoatkihong kompoakepahmwio
 Depit? Dahme ke sohte iangki?”

18 Usai ahpw sapeng, patohwan, “Kakete I en
 iang ih? I uhdahn patohwan uhpalihki me KAUN-
 O ketin pilada, me aramas akan pilada, oh me
 mehn Israel koaros pilada en wiahla ar nan-
 mwarki, I pahn ieiang komwihte. **19** Pwe ihs me
 I pahn uhpahtiong? Kaidehkin nein ei soumas? I
 pahn papah komwi nin duwen ei papahier omwi
 pahtpao.”

20 Apsalom eri sohpeiong Ahidopel oh mah-
 sanihong, “Dahme komw pahn kaweidkin kiht?
 Dahme kitail pahn wia?”

21 Ahidopel eri sapeng, patohwan, “Komw keti-
 wei oh kapwaiada nsenen pwopwoud rehn en
 omwi pahtpa eh pekehi kan me e ketikihdi pwe re
 en apwahpwalih tehnpeseo. Eri, aramas koaros
 en Israel ahpw pahn rong me komwi wialahr
 imwintihtien omwi pahtpao; oh iengomwi kan
 pahn perenkikhda.” **22** Irail eri kauwadahng
 Apsalom impwal ehu pohn tehnpaso wasahn

mwemweit. Eri, mwohn mesen aramas koaros Apsalom ahpw ketilong loale oh wiahda nsenen pwopwoud rehn en eh pahpao eh pekehi kan.

²³ Kaweid me Ahidopel kin kihda ni ahnsowo kin pweida rehrail, pwe re kin idawehn duwehte ar kin kapwaiada mahsen en Koht; Depit oh Apsalom, ira koaros kin kapwaiada.

17

Usai Kaweidsuwedih Apsalom

¹ Ahidopel ahpw patohwanlahng Apsalom, “I pahn pilada sounpei 12,000 oh mweselte pwohnget pwe I en pwakihala Depit. ² I pahn mahweniong nindokon eh ngiralahr oh nan kupwur tikitiklahr. E pahn masepwehkada oh ienge kan koaros pahn tangdoaui. Ih kelehpw me I pahn kemehla, ³ oh ienge kan koaros I pahn patohwandohng rehmwi, rasehng lih kommwad emen me pahn pwarodohng rehn eh pwoud. Metehmen me komw ketin kupwurki en mehla; aramas teiko koaros pahn poadoandoarla.” ⁴ Apsalom oh kaunen mehn Israel ko koaros ahpw pwungikhda soangen kaweid wet.

⁵ Apsalom ahpw mahsanih, “Kumwail ekerodo Usai pwe kitail en rong dahme e pahn patohwan.”

⁶ Ni Usai eh lel wasao, Apsalom ahpw mahsanihong, “Iet kaweid me Ahidopel patohwandohng kiht; dahme omw lamalam ong? Se en idawehn, de soh? Ma soh, a patohwandohng kiht dahme se en wia.”

⁷ Usai ahpw sapeng, patohwan, “Kaweid en Ahidopel en ahnsou wet me inenen sapwung. ⁸ Komw mwahngih duwen omwi pahpa Depit oh sapwellime sounpei kan ar nohn kehlail en mahwen, oh duwen ar rasehng pehr kommwad en nanwel men me nah kan kin pirapasang. Omwi pahpao iei sounpei koahiek men oh e sohte kin ketin pweidi rehn sapwellime sounpei kan. ⁹ Mweinele ahnsou wet e ketin rukurukseli nan pwoaren paip de nan ehu wasa tohrohr. Eri, ni ahnsou me Depit pahn ketin mahweniong sapwellimomwi sounpei kan, mehmen me pahn rong irair wet pahn nda me sapwellimomwi aramas akan lohdiong pahn Depit. ¹⁰ Eri, aramas me keieu kommwad, kommwad sang laion kan, pahn masepwehkada, pwe mehn Israel koaros ese me omwi pahpao iei uhdahn sounpei kommwad emen oh sapwellime sounpei ko me kehlail. ¹¹ Eri, iei ei kaweid en met, komw ketin kapokonepene mehn Israel koaros, sang apali sahpwet lel apali, me uwen tohtohn irail duwehte piken ni oaroahr kan, oh komw pein kaunirailda nan mahwen. ¹² Kitail pahn rapahki oh diarada Depit wasa me e ketiket ie, oh kitail ahpw pahn mahweniong mwohn eh pahn mwahngihada dahme wiewiawi. Ih oh ienge ko sohte pahn pitla. ¹³ Ma e pahn pweieklahng nan kahnimw ehu, sapwellimatail aramas akan koaros pahn walahng sellap kahnimwo oh karangkehdi, re sohte pahn mweidohng takai ehu en luhwehdi poahn dohlo wasao.”

¹⁴ Eri, Apsalom oh mehn Israel koaros ahpw mahsanh, “En Usai eh kaweid me mwahuhsang mehlel en Ahidopel.” KAUN-O ahpw ketin koa-

soanehdi pwe en Ahidopel eh kaweid mwahu en dehr pweida, pwe Apsalom en paisuwedkihla.

Depit Ale Pakairpen Kaweido oh Tangdoaui

¹⁵ Usai eri ndaiong samworo ko, Sadok oh Apa-
iadar, soangen kaweid me e patohwanohng Ap-
salom oh kaunen mehn Israel ko, oh pil soan-
gen kaweid me Ahidopel kihong irail. ¹⁶ E
ahpw pil ndaiong ira, “Nna, kumwa mwadang
kadarwohng Depit pakair pwe en dehr ketin
pweiekidi ni wahsahn kot kan ni pillapo nan
sapwtehno, ahpw en ketin kotehla mwadang Pil-
lap Sordan, pwe ih oh sapwellime aramas akan en
dehr lohdi oh kamakamala.”

¹⁷ Eri, Sonadan oh Ahimas awiawih nan En-
rokel, pwehki ara sohte men aramas en kilang
ara pahn pedolong nan kahnimwo. Serepein lidu
men ahpw kin kohla oh padahkikhong ira dahme
wiewiawi, a ira kohla oh kairehki Nanmwarki
Depit. ¹⁸ Ahpw ni ahnsowo pwutak emen ki-
langirahda, e ahpw kohla padahkikhong Apsalom;
ira ahpw mwadangala oh rukula ni imwen ohl
emen nan Pahurim. Eri, pwarer ehu mi limwahn
imwen ohlo, me sohte pile, ih wasa ira rukula ie.
¹⁹ En ohlo eh pwoudo ahpw ale mehn pweipwei
ehu oh pwainkihdi ewen pwarero, oh kamwarak-
diong powe weren kohn kei, pwe ira en sohte
kak dierekda. ²⁰ Sapwellimen Apsalom kaunen
sounpei kei ahpw kohdo oh idek rehn liho, “Ia
Ahimas oh Sonadan?”

A e sapeng, ketihtihki, “Ira kotelahr pillapo.”

Ohlo ako ahpw raparapahkin ira oh sohte diari-
rahda; irail eri pwuralahng Serusalem. ²¹ Mwurin
ar pwuralahr, Ahimas oh Sonadan ahpw pwarada

sang nan pwarero, ira ahpw kohla kairehki mehkoaros Depit. Ira patohwanohng duwen koasoandi me Ahidopel wiahiong nanmwarkio; ira ahpw padahkikhong, “Komw ketin mwadang kotehla pillapet.” ²² Depit oh sapwellime ko eri tapihada kotehla Sordan, oh nin sohrahno koaruhsie kotelahr Sordan, sohte emen luhwehdi.

²³ Eri, ni Ahidopel eh kilangada duwen eh kaweido eh sohte pweida, e lusdahng pohn dakepe ahso oh tenge uhdakeo. Ni eh koasoanedier soahng koaros ni imweo, e ahpw lusiamala. E seridi ni sousoun eh peneinei.

²⁴ Depit ahpw ketin lellahng nan kahnimw Mahanaim ni ahnsou me Apsalom oh mehn Israel ko kotehla Sordan. ²⁵ (Apsalom ahpw kasawiladahng Amasa en wiliandi Sohap oh wia kaun lapalap en karis kan. Amasa iei nein Seder, mehn Ismael; eh nohno iei Apikail, nein Nahas, Nahas rien Seruaia, en Sohap eh nohno.) ²⁶ Apsalom oh mehn Israel ko eri kauwada imwarail impwal ko nan wehin Kilead. ²⁷ Ni Depit eh lel nan kahnimw Mahanaim, Sopi ahpw tuhwong ih; eri, Sopi iei nein Nahas, mehn kahnimw Rappa nan Ammon; oh Makir, nein Ammiel, mehn kahnimw Lodepar pil tuhwong Depit, oh pil Parsilai, mehn kahnimw Rokelim nan Kilead. ²⁸⁻²⁹ Irail patohwandoing Depit pwohl, einpwoat, lohs, oh tehi. Re pil wahdo konot en Depit oh sapwellime sounpei ko, me duwehte wahn pilawa, parli, werentuhke inihn, pihns, sukehn loangalap, sihs, milik oh sihpw kei. Pwe re ese me Depit oh sapwellime sounpei ko pahn men konotada, oh pil men konotpilda, oh pahn ngirala nan saptehno.

18*Lohdi oh Kamakamalahn Apsalom*

¹ Nanmwarki Depit eri ketin kapokonepene sapwellime sounpei ko, ahpw ketin nehkpeseng ni pwihn kei wad kid oh wad epwiki, e pil ketikihong kaunaparail. ² Ih eri ketin kadarihrpeseng ni pwihn siluh, ehu pwihn Sohap me kaunda, a ehu pwihn Apisai, rien Sohapo, me kaunda, a ehu pwihn Idai mehn Kad me kaunda. Nanmwarkio eri mahsanhong sapwellime ko, “I pahn iang kumwail kowohng mahwen.”

³ A irail ahpw sapeng, patohwan, “Soh, maing! Komw sohte pahn ketin iang kiht. Pwe ma se pahn wekdeksang mahweno oh tangdoaui, de ma elep en kiht pahn kamakamala, atail imwintihi ko sohte pahn nsenohki; pwe komwi re kin kapahrekiong kiht me 10,000. Me pahn mwahu ma komw pahn ketikette nan kahnimwet oh kin ketin kadaralahng kiht sapwellimomwi sawas.”

⁴ Nanmwarkio eri ketin sapeng, mahsanh, “I pahn wia mehkoaros me kumwail lemeleme me pahn mwahu.” E ahpw ketin uh ni wenihmwen kelen kahnimwo, nindokon sapwellime sounpei ko ar kapakapar kohiei ni pwihnen wad kid oh epwiki. ⁵ E ahpw ketin mahsanhong Sohap, Apisai oh Idai, “Kumwail menlau dehpa wiahiong mehkot nei pwutak Apsalom, kumwail dehpa kalipwelipwehda.” Karis koaros eri rong mahsen pwoatet me Depit ketin wiahiong sapwellime kaun ako.

⁶ Karis en Depit eri kohieila nan sahpwo pwe re en mahweniong mehn Israel ko nanwel en

Epraim. ⁷ Sapwellimen Depit sounpei ko eri kalowehdi karis en mehn Israel ko. Mahweno inenen mwuledek mehlel, pwe aramas 20,000 me kamakamala rahno. ⁸ Mahweno inenen paraparala wasa koaros nan sahpwo. Eri, me mehla nanwelo tohtohsang me mehla nan mahweno.

⁹ Eri, ni ahnsowo, Apsalom ahpw tuhwong ekei sapwellimen Depit sounpei ko. È dake ahs emen, oh ni eh tangatang kolahng pahn tuhke rarahn pwoat, pitenmonge reirei ahpw tengala ni rahn tuhke ko. Eri, ahso ahpw tangatanete kohla, a Apsalom mwotomwotou ni rahn tuhkeo. ¹⁰ Emen sapwellimen Depit sounpei ko ahpw kilangada oh pakairkihong Sohap, “Maing, I kilang Apaslon eh mwotomwotou ni rahn tuhke pwoat.”

¹¹ Sohap ahpw sapengki, “Mehlel ke kilang? A dahme ke sohte kemehkihla ahnsowohte? Pwe I en katingihkin uhk mwohni silper eisek oh ehu katengen?”

¹² Ohlo ahpw sapeng, nda, “Mehnda ma komw pahn ketikihong ie mwohni silper kid, ahpw I sohte pahn kamwakid apwoat sendin pehi kat ong sapwellimen nanmwarkio. Kitail koaros rongehr sapwellimen nanmwarki mahsen ong komwi oh Apisai oh Idai, ‘Kumwail menlau dehr wiahiong mehkot Apsalom, kumwail dehr kalipwelipwe-hda.’ ¹³ Eri, ma I sohte peikiong ahpw kemehla, eri, nanmwarkio uhdahn pahn ketin karongehda, pwe e kin karonge mehkoaros—a komw sohte kak doareiehla.”

¹⁴ Sohap eri ketihtihki, “Eri, I solahr pahn kauwehla mwahl ahnsou rehmw!” Ih eri ale ketieu silipwoat oh doakoahki nan

mwaremwaren Apsalom nindokon eh momourte esiesingek, langalang ni rahn tuhkeo. ¹⁵ Eri, sapwellimen Sohap sounpei ehk ahpw keilahng mpe oh kadouluhlla.

¹⁶ Sohap eri ruwese pwe sowi en pepeuk pwe mahweno en katokotokdi, nah sounpei ko ahpw pwurodo sang ar pwakipwakih mehn Israel ko. ¹⁷ Irail eri ale kahlep en Apsalom oh kesehdiong nan pwoahr ehu nanwelo, oh pwainkihdi lapalahn koasoakoasoak en takai ehu. Mehn Israel ko koaros eri tangdoaui, emenemen tangalahng nan uhdake.

¹⁸ Ni ahnsou me Apsalom momour e kauwada mehn kataman ehu ong pein ih nan Wahun Nanmwarki, pwehki eh sohte nah pwutak mehn kadakadaur ede. Ih eri kihong pein edeo eden mehn katamano. Eri, sang mahs kohdo lel rahnwet e adaneki Mehn Kataman en Apsalom.

Depit Alehdi Pakairpen Mehlahn Apsalom

¹⁹ Ahimas, nein Sadok, eri ndaiong Sohap, “Komw mweidohng ie I en kolahng pakairkihong nanmwarki rohng mwahu wet duwen KAUN-O eh ketin kapitasang ih rehn sapwellime imwintihi kan.”

²⁰ Sohap ahpw ketihtihki, “Soh! Rahnwet ke sohte pahn wahlra rohng mwahu pwoat. Ehu rahn ke pahn kak wia met, a rahnwet soh; pwehki sapwellimen nanmwarki pwutako sipallahr.” ²¹ Ih eri padahkikhong eh lidu men, mehn Sudan, “Kowe me kohwei oh padahkikhong nanmwarki mehkoaros me ke kilangehr.” Laduwo eri poaridi oh tangatangala.

22 Ahimas ahpw pwurehngete eh pekipek, nda, “I sohte nsenohki dahme pahn wiawi; a komw ketin mweidohng ie I en pil wahla rohng pwoatet.”

Sohap eri idek reh, “Dahme ke men wahkihilahki? Pwe ke sohte pahn alpweipweiki.”

23 Ahimas ahpw pwurehng nda, “I men kohlahte, mehnda ma I sohte ale mehkot.”

Sohap eri ketihtihki, “Eri, kohwei.” Ahimas eri tangidihte nanial en Wahun Sordan daulih mehn Sudano.

24 Eri, ni ahnsowo, Depit ketiket nan mwoale nanopwungen ewen kehl riaun kahnimwo. Silepeo kohdahla pohn kehlo oh mihami pohn ewen kehlo. E ahpw kilenglahte kilangada ohl emen me kelehpw tangatang kohdo. **25** Silepeo eri werki oh pakairikhong nanmwrkio. Nanmwarkio ahpw mahsanih, “Ma e kelehpw, e weuwa kohdo rongamwahu.” Aramas me tangatang kohdo wie kerederendohr.

26 Silepeo ahpw pil kilangada ohl tohrohr emen me pil kelehpw tangatang kohdo, e ahpw pil werkilahng silepen wenihmwo, nda, “Kilang, pwe pil emen ohl tangatang kohdo.”

Nanmwarkio ahpw ketin sapeng, mahsanih, “Memenet pil weuwa kohdo rongamwahu.”

27 Silepeo ahpw patohwan, “Ohl me tang mahso mwomwen Ahimas.”

Nanmwarkio ahpw mahsanih, “Ohl mwahu men ih; oh e weuwa kohdo rongamwahu.”

28 Ahimas eri ngihih laudida rahnmwahwi nanmwarkio. E ahpw poaridiong nanopwel oh patohwan, “Kaping ong KAUN-O, omwi Koht, me ketin

kupwurehiong komwi en powehdi aramas ako me men pelian komwi, Wasa Lapalap.”

²⁹ Nanmwarkio eri keinemwe, mahsanh, “Ia duwen pwutak Apsalom, e momourte oh me kehlail?”

Ahimas ahpw sapeng, patohwan, “Maing, ni sapwellimomwi kaunen sounpei Sohap kadariehdo, I kilangada lapalahn mwekid ehu, ahpw I sohte kak dehdehki dahkot mwo.”

³⁰ Nanmwarkio ahpw mahsanhong, “Awih ie mahs men!” Ahimas eri uhda oh mihami wasao.

³¹ Ni ahnsowohte, mehn Sudano ahpw leledo oh patohwanohng nanmwarkio, “I patohwando rohng mwahu pwoat ong nanmwarki, Wasa Lapalap. Rahnwet KAUN-O ketikihong komwi lingan en powehdi irail koaros me men pelian komwi.”

³² Nanmwarkio ahpw ketin keinemwe, mahsanh, “Ia duwen pwutak Apsalom, e momourte oh me kehlail?”

Mehn Sudano eri sapeng, patohwan, “I ahpw men sapwellimomwi imwintihti kahngohdiong komwi, maing, en pweisaneki soahngohte me wiawihong sapwellimomwi pwutak Apsalom.”

³³ Nanmwarkio eri kupwur toutoula. E ahpw ketidahla nan pere ehu pohn wenihmwen kehlo oh tentenahr. Ni eh ketiket kohla, e tentehnihr, mamahsanh, “Nei pwutak, nei pwutak Apsalom! Apsalom nei pwutak! Ma ngehi me wilianuhkedi oh mehla. Nei pwutak Apsalom!”

19

Sohap Kapwungohng Depit

¹ Pakair eri kohieng Sohap me Nanmwarki Depit ketin wie tentenahrki Apsalom. ² Eri, lingan en powehdi ahpw wekidekiong ni nsensuwed oh mwahiei rahno rehn karis koaros en Depit, pwehki ar rongada me nanmwarkio ketin wie mwamwahieiki sapwellime pwutak. ³ Irail eri pwurala nan kahnimwo pahtou, duwehte sounpei me kin namenengki ar tangasang ar imwintihi. ⁴ Nanmwarkio eri ketin perehla silangi oh tentenahr ni kapitie laud, mahsanih, “Nei pwutak Apsalom!”

⁵ Sohap eri patohla ni tehnpas en nanmwarkio oh patohwan, “Rahnwet komw ketin kasarowehdi sapwellimomwi sounpei kan, me doareikomwihla oh mouren sapwellimomwi pwutak oh serepein kan, oh pil sapwellimomwi likend oh pekehi kan. ⁶ Komw ketin uhwong irail kan me kin poakohng komwi, ahpw ketin sewesehda irail me kin kailongkin komwi. Komw ketin kasalehda duwen omwi sohte mwahn ketin kesempwaliki sapwellimomwi kaunen sounpei kan oh sounpei kan. I patohwan ese me komw pahn kupwurperenki ma Apsalom pahn momourte rahnwet oh kiht koaros pahn mehla. ⁷ Eri met, komw ketila mahseniong sapwellimomwi aramas akan. Pwe ma soh, I patohwan kahukihla ni mwaren KAUN-O me sohte emen pahn iang komwi mi met nimenseng en lakapw. Oh ih met apwal laud me keieu suwed me pahn lelohng komwi nan omwi mour.” ⁸ Nanmwarkio eri ketida oh ketilahng ni wenihmwen kehlo oh ketidiong ie. Sapwellime aramas ako eri rongada me e ketiket wasao, irail

eri patopene oh kapilpene.

Depit Kaunopada Sapahllahng Serusalem

A ni ahnsowo, mehn Israel ko koaros tangdoau, emenemen kolahng ni imwe. ⁹ Eri, wasa koaros nan wehio re ahpw mwoaromwoarongkipene nanopwungarail, ndinda, “Nanmwarki Depit ketin kapitkitaila sang atail imwintihi kan. E pil doareikitaila sang mehn Pilisdia kan. A met e ketin tangasang Apsalom oh pil sang wehiet. ¹⁰ Se keiehdi Apsalom pwe en wiahla at nanmwarki, ahpw met e ketin sipallahr nan mahwen. Eri, dahme sohte emen me pahn song en kapwurehkihido Nanmwarki Depit rehtail?”

¹¹ Eri, rohng pwoatet me mehn Israel ko koasoakasoia ahpw lel karong en Depit. Ih eri poaronehla samworo Sadok oh Apaiadar pwe ira en kalelapak rehn kaunen Suda ko, nda, “Dahme kumwail pwand en sewesehki nanmwarki oh kapwuredohng nan tehpeseo? ¹² Pwe kumwail uhdahn kisehi, kisehn udukei oh ntahi. A dahme kumwail sohte pahn tiengki mwohn aramas koaros pwe kumwail en kapwuredohng ie nan dewei?” ¹³ Depit ahpw pil mahsanihong ira en patohwanohng Amassa, “Kowe uhdahn kisehi. Sang met kohla I pahn kasapwiluhkada pwe ke en kaunda nei karis en sounpei kan, wiliandi Sohap. Koht en ketin keriehla ma I sohte pahn kapwaiada met.” ¹⁴ Mahsen en Depit pwukat ahpw kalowehdi lamalam en ohl koaros en Suda. Irail eri kadaralahng audepen arail lamalamteieu me ketihihki me Depit en ketin sapahldo iangahki sapwellime lapalap akan koaros.

¹⁵ Eri, ni ahnsou me nanmwarkio ketin pwurupwurala, ohlen Suda koaros ahpw tuhwong ni Pillap Sordan. Re pokondohng Kilkal pwe re en kasamwo oh sewese pwe en kotehla Sordan. ¹⁶ Ni ahnsowohte, pil Simei sang kadaudok en Pensamin, nein Kera, mehn Pahurim, iang mwadan galahng Sordan pwe en tuhwong Nanmwarki Depit. ¹⁷ E kahre ohl kid sang nan kadaudok en Pensamin. Pil Sipa, ladun sapwellimen Sohl peneinei, iang kohdo, iangahki nah pwutak ehk limmen oh ladu riehk. Re ahpw lel ni pillapo mwohn nanmwarki eh ketin lel wasao. ¹⁸ Irail eri kotehla pillapo mwohn nanmwarkio pwe re en sewese sapwellime ko oh wiahda mehkoaros me e ketin kupwurki.

Eri, ni ahnsou me nanmwarkio ketin onohnop en kotehla pillapo, Simei ahpw poaridi mwowe, ¹⁹ patohwan, “Maing, Wasa Lapalap, komw ketin kupwurmahk oh ketin meliehla sapwungo me I wiadahr rahno me komw ketin mweselsang Serusalem. Komw kupwurkalahngan meliehla oh dehr kupwukupwure. ²⁰ I patohwan ese me I dipadahr ong komwi, maing; ihme I pwarkihdo rahnwet mwohn kadaudok en paliepeng teikan pwe I en patohwan tuhwong Wasa Lapalap.”

²¹ Apisai, nein Seruaia, ahpw patohwan, “Simei uhdahn konehng en kamakamala, pwehki eh lahlahwe ih me KAUN-O ketin pilada en nanmwarki.”

²² A Depit mahsanihlahng Apisai oh rie Sohap, “Ihs me idek duwen amwa lamalamen? Ngehi me nanmwarkien Israel rahnwet, oh sohte mehn

Israel men pahn kamakamala rahnwet.” ²³ E ahpw mahsanihlahng Simei, I inoukihong uhk me ke sohte pahn kamakamala.”

Depit Kasalehda eh Kadekohng Mepiposed

²⁴ Eri, Mepiposed, nein sapwellimen Sohl pwutak pil iang patohdo pwe en tuhwong oh rahn-mwahwihih nanmwarkio. E sohte mwahn widenda neh ko, sohte mwahn karada eh alis de lopworada eh likou sang ahnsou me nanmwarkio ketiketla sang Serusalem lel ahnsou me e ketin sapahldo ni lingan en powehdi. ²⁵ Eri, ni ahnsou me Mepiposed leledo sang Serusalem pwe en tuhwong nanmwarkio, nanmwarkio ahpw mahsanihong, “Mepiposed, dahme ke sohte iangkiniehla?”

²⁶ A e sapeng, patohwan, “Duwen omwi mwahngih, maing, Wasa Lapalap, I nehtuk pali koaros. I patohwanohng ei laduwo en onopada dakepei ahso pwe I en dake oh iangkomwiwei, ahpw e pitihiehdi. ²⁷ E karaunmwahlih ie rehn Wasa Lapalap. Ahpw komwi me rasehng tohnleng en Koht, iei me komw ketin wia dahme pwung me komw ketin kupwurki. ²⁸ Peneineien ei pahpao koaros uhdahn konehng en kamakamala, komwi ahpw ketin mweidohng ie I en iang kepin konot ni sapwellimomwi tehpel. Sohte katepen I en pil peki kalaudpen kupwurkalahngan sang Wasa Lapalap.”

²⁹ Nanmwarki eri ketin sapeng, mahsanih, “Arier pato! Pwe I koasoanedier me kowe oh Sipa pahn ahneki sapwellimen Sohl dipwisou kan.” ³⁰ Mepiposed ahpw sapeng, patohwan,

“Sipa nek ahnekihla koaros. Pwe ngehi e pahn itarohngiehte Wasa Lapalap e ketin sapahldo ni paiamwahu.”

³¹ Parsilai, mehn Kilead, pil iang pwarodo sang Rokelim pwe en iang kasamwo nanmwarkio oh iang sewese kotehla pillapo, ³² Parsilai, inenen ohl laud, sounpar 80. E inenen kepwehpwe oh ih me kin kikihong konot en nanmwarkio ni eh kin ketiket Mahanaim. ³³ Nanmwarkio eri mahsanihong, “Ke pahn iang ie kohla Serusalem, I ahpw pahn apwalihiuuk.”

³⁴ Parsilai ahpw sapeng, patohwan, “Ei mour mwotomwotalahr; eri, dahme I pahn iangki nanmwarki patohdalahng Serusalem? ³⁵ I sounpar 80, oh I solahr kin nsenamwahuki mwenge me I kin kang de nim, I pil solahr kak rong ngilen sounkoul kan. I pahn wia kedirepw ehu ong Wasa Lapalap. ³⁶ I sohte warohng soangen kalahngan wet. Eri, I pahn iang komwiweite lel palipahn Sordan. ³⁷ Komw kupwurei ie pwe I en pwurala ni ei tungoal ihmwo oh mehla limwahn sousoun kisehi ko. Iet nei pwutak Simam, komw ketikihda oh ketin wiahiong dahme komw ketin kupwukupwure me pahn mwahuwong.”

³⁸ Nanmwarkio eri ketin sapeng, mahsanih, “I pahn wahda oh wiahiong mehkoaros me ke anahne. Oh I pahn mweidohng uhk mehkoaros me ke pahn peki.” ³⁹ Depit oh sapwellime ko koaros ahpw kotehla Pillap Sordan. E ketin metik Parsilai oh rahnmwahwih; a Parsilai ahpw pwurala ni imwe.

40 Ni nanmwarkio eh kotelahr Sordan, iangahki ohlen Suda koaros oh elep en mehn Israel kan, e ahpw ketila Kilkal, oh Simam pil iang.
41 Mehn Israel koaros ahpw patohla reh oh patohwanohng, “Maing, Wasa Lapalap, dahme riatal ko, mehn Suda ko, adihasangkin kiht komwi oh kahreikomwihdo, iangahki sapwellimomwi peneinei oh sapwellimomwi aramas akan, oh kotehdo Sordan?”

42 Mehn Suda ko eri sapeng, patohwan, “Se wiahda met pwe nanmwarkio iei kiseht. Eri, dahme kumwail pahn lingeringerkihda? Pala ih me ketin katungoalei kiht, de ketikihong kiht mehkot?” **43** Mehn Israel ko eri sapeng, patohwan, “Kiht me ahneki pwuhng laudsang kumwail ong Nanmwarki Depit, mehnda ma kisehmwail. Dahme kumwail mwamwahlkinkitki? Pwe kiht me tepin koasoiahda kasapahldohn nanmwarki reht.”

Ahpw mehn Suda ko me kehlail ni ar akupwung sang mehn Israel.

20

Moromor en Sipa

1 Mie ohl emen nan Kilkal me adsuwed, ede Sipa nein Pikri, sang kadaudok en Pensamin. E ahpw peuk sowi oh ngil laud patohwan, “Sohte atail ong Depit! Kitail dehr idawehn! Ohl en Israel kan, kitail kohkohla ni imwatail kan!” **2** Mehn Israel ko eri sohpeisang Depit oh idawehnla Sipa, ahpw mehn Suda ko dadaurete ar loalopwoat oh ididawehnte Depit sang Sordan lellahng Serusalem.

³ Ahnsou me Depit lel ni tehnpeseo nan Serusalem, e ahpw kihong silepen sapwellime pekehi ehko me e ketikihdi pwe re en sinsile tehnpeseo. E koasoanehdi soahng koaros me re pahn anahne, ahpw e sohte ketin wia nsenen pwopwoud ong irail. Re mihamihte nan seliparail erein ar mour, momour duwehte liohdi.

⁴ Nanmwarkio eri mahsanihong Amasa, “Kapokonepene mehn Suda kan, komw ahpw pwurodo met pali iangahki aramas pwukat.”

⁵ Amasa eri kohla ekerirailpene, ahpw e sohte pwurodo ni rahn me nanmwarki ketin kilelehdi.

⁶ Nanmwarkio eri mahsanihong Apisai, “Sipa pahn kihong kitail apwal me pahn laudsang me Apsalom kihong kitail. Komw ale nei sounpei kan oh pwakihala, pwe e de kousoanla nan ekei kahnimw me kehl kehlail oh pitsang kitail.” ⁷ Eri, nein Sohap sounpei ko, me kin sinsile tehnpaso, oh sounpei teiko koaros ahpw iangada Apisai, irail eri mweselsang Serusalem oh pwakihala Sipa. ⁸ Ni ahnsou me re lel paipalap en Kipeon, Amasa ahpw tuhwong irail. Sohap mi nan eh likoun mahwen, nah kehlahs mwotomwotou ni pengepenge. Ni eh aluhla, nah kedlahso pa pwupwudi.

⁹ Sohap ahpw ndahng Amasa, “Ia iromw kompoakepahi?” Peh pali meing ahpw koledi eh alis ko pwehn metik ih. ¹⁰ Amasa sohte tehk mwahu kedlahs me Sohap kolokol nan peh palimaun, Sohap eri doakoahki kapehdeo, mwasahle ko eri pwediei. E ahpw melahte ni ahnsowo, oh Sohap sohte pil pwurehng doakoa.

Sohap oh rie pwutak Apisai eri pwakihala Sipa.

11 Emen nein Sohap sounpei ko ahpw kesihnenda limwahn paliweren Amasa oh nda, “Mehmen me men idawehn Sohap oh Depit, en iangada Sohap.”

12 Paliweren Amasa, diren nta, wie wonohn nanwerengen ahlo. Nein Sohap sounpei ko eri kilangada me aramas akan kin alu wasao oh uhdi kilikilang, re ahpw wurahdekiolahng nan dihpw ko oh pwainkihdi pilangkes ehu. **13** Mwurin paliwereo eh wisiksang nanialo, irail koaros ahpw iang Sohap pwakihala Sipa.

14 Sipa kotehla sapwen kadaudok koaros en Israel, e ahpw kohdo ni kahnimw en Apel Ped Maaka, oh peneinei koaros en Pikri ahpw pokonpene oh idawehnla kolahng nan kahnimwo. **15** Nein Sohap sounpei ko ahpw rongada me Sipa mihmi mwo, irail eri kohla mahweniong kahnimwo. Re kauwada kehndake pwehl ehu maslikin kehlo oh tapihada weir pahn kehlo pwehn karangkehdi.

16 Mie lih lamalam mwahu men nan kahnimwo me ngil laud likwersang pohn kehlo, nda, “Kumwail rong! Kumwail rong! Kumwail ndahng Sohap en kohdo wasaht; I men lokaiaiong.”

17 Sohap eri kohla, a liho idek reh, “Komwi me Sohap?”

E ahpw sapeng, “Ei, ngehi met.”

Liho ahpw nda, “Maing, komw kupwurkalahngan karonge ie.”

E ahpw sapeng, nda, “I rongorong komwi.”

18 A liho nda, “Kawao re kin nda, ‘Kohwei oh ale pasapeng nan kahnimw en Apel’—eri ihme re wia. **19** At kahnimwet me laud, iei ehu kahnimw meleilei oh loalopwoat nan Israel. Dahme komw

songosongki en kauwehla? Komw men kamwomwala dahme uhdahn sapwellimen KAUN-O?”

²⁰ Sohap ahpw sapeng, nda, “Soh douluhl! I sohte pahn kamwomwala amwail kahnimw!
²¹ Kaidehn ih men at koasoandi. Ohl emen ede Sipa, nein Pikri, mehn sahpw nahnhahn Epraim, e tapirohadahr moromor ehu ong nanmwarki Depit. Kumwail kihdo ohl menet rehi, I ahpw pahn pweiekla sang ni kahnimwet.”

A liho nda, “Se pahn kesehwei moangeo rehmwail sang pohn kehlet.” ²² Liho eri kohla rehn aramas en kahnimwo oh weuwa nan kapehde koasoandi wet. Irail eri lupukasang moangen Sipa oh kesehla pohn kehlo rehn Sohap, Sohap eri peuk nah sowi kilel ong nah sounpei ko me re en mjeselda; irail eri pwurala nan arail wasa. A Sohap pwurala rehn Nanmwarki Depit nan Serusalem.

Sapwellimen Depit Lapalap akan

²³ Sohap me kaun lapalap en karis en sounpein Israel kan. Penaia nein Sehoiada me kin apwahpwalih silepen Depit kan; ²⁴ Adonairam me kin apwalih doadoahk laud kan; Seosopat nein Ahilud me kin kaunen palien pwuhk; ²⁵ Sepa me sounnting en tehnpaso; Sadok oh Apaiadar me wia samworo, ²⁶ oh Aira sang kahnimw Sair iei ih pil emen sapwellimen Depit samworo.

21

Kadaudok en Sohl kan Kamakamala

¹ Ni mwehin Depit lehk lapalap ehu ahpw wiawi me reireiki sounpar siluh. Depit eri rapahki

kupwur en KAUN-O, KAUN-O eri ketin mahsanihong, “Sohl oh eh peneinei dipikidahr dipen kamaramas, e kemehla mehn Kipeon.”² (Mehn Kipeon kan kaidehn uhdahn mehn Israel; irail wia pwihn tikitik ehu en mehn Amor, me mehn Israel ko inoukihda me re pahn apwahpwalih irail, ahpw Sohl song en kamwomwirailla pwehki eh ngoangki epwelpen mehn Israel oh Suda.)³ Depit eri malipepene mehn Kipeon ko oh mahsanihong irail, “Dahme I kak wiahiong kumwail? I men kapwungala sapwung me wiawihong kumwail, pwe kumwail en kapaiahda sapwellimen Koht aramas akan.”

⁴ Irail eri sapeng, patohwan, “Silper de kohl sohte kak kapwungala nanpwung suwed nanpwungen kiht oh en Sohl peneinei, se sohte pil men kemehla mehn Israel men.”

Depit eri keinemwe, “Eri, dahme kumwail kupwukupwure I en kak wiahiong kumwail?”

⁵ Re ahpw sapeng, patohwan, “Sohl men kamwomwkitala oh sohte men emen en luhwehdi momour ekis wasa nan Israel.⁶ Eri, komw ketiki-dohng kiht ohl isimen me kadaudok en Sohl, se ahpw pahn langairailda mwohn KAUN-O nan Kipea, en Sohl eh wasa, Sohl me KAUN-O ketin piladahr.”

Nanmworkio ahpw sapeng irail, mahsanih, “I pahn patohwanohng kumwail.”

⁷ Ahpw pwehki inou sarawi me Depit oh Sonadan wiahda nanpwungara, Depit ketin kupwarehla nein Sonadan pwutak Mepiposed, me paahpa kahlapki Sohl.⁸ Ahpw e ale Armoni

21:2: Sos. 9.3-15. **21:7:** 1 Sam. 20.15-17; 2 Sam. 9.1-7.

oh Mepiposed, pwutak riemen me Rispa nein Aiah serepein wiahiong Sohl; e pil ale pwutak limmen me nein Sohl serepein Merap wiahiong Adriel, nein Parsilai, mehn Mehola.⁹ Depit eri kadariraillahng rehn mehn Kipeon, re ahpw langairilda pohn nahnao mwohn silangin KAUN-O—irail koaros me isimeno wiahkinteieu mehla. Tepin ahnsoun rik wahn parli, me re kamakamala.

¹⁰ En Sohl eh pekehi Rispa, nein Aiah serepein, ahpw doadoahngki likoun nsensuwed pwehn wiakihsa imwe kisin pelien ihmw pohn takai wasa me paliweren me mehla ko mi ie; e ahpw mihmi wasao sang ni tepin rahnen rik wahn-sahpw lel ahnsou me keteu kin mwer. Ni rahn e kin karawansang menpihr kan pohn me mehla ko, a nipwong e kin silehsang mahn lawalo kan.

¹¹ Ni ahnsou me Depit karongehda dahme Rispa nein Aia serepein wiewia,¹² e ketila ale tihn Sohl oh nah pwutak Sonadan sang rehn mehn Sapes nan Kilead. (Re pirapahsang tih ko ni wasahn tuhpene en kahnimwo nan Ped San, wasa me mehn Pilisdia ko langahda ie paliwar ko ni rahn me re kemehla Sohl pohn Nahna Kilpoa.)¹³ Depit eri ketikihsa tihn Sohl oh Sonadan oh pil kihpene tihn ohl isimen me langadahr wasao,¹⁴ re ahpw sarepedi tihn Sohl oh Sonadan nan sousoun Kis, semen Sohl, nan Sela nan sapwen Pensamin, re wiahda koasoandien namwarkio koaros. Oh mwurin mwo, Koht ahpw ketin karonge kapakap en tohn sahpwo.

21:8: 1 Sam. 18-19. **21:12:** 1 Sam. 31.8-13.

*Mahwen ong Kodon en Pilisdia kan
(1 Kronikel 20.4-8)*

¹⁵ Mie pil ehu mahwen nanopwungen mehn Pilisdia oh mehn Israel, Depit oh nah sounpei ko ketila oh mahweniong mehn Pilisdia kan. Nan ehu mahwen ko, Depit inenen ngirala. ¹⁶ Emen kodon en Pilisdia ko, ede Ispipenop, me weuwa ketieu prons pwoat me toutouki paun isuh elep oh e kapwatki kedlahs kapw pwoat, e ahpw medemedewe me e kak kemehla Depit. ¹⁷ Ahpw Apisai nein Seruaia sewesehda Depit, mahweniong kodono, oh kemehla. Sapwellimen Depit sounpei ko eri patohwanohng Depit en ketin inoukihda me e solahr pahn pwurehng iang irail ketila mahwen. Re patohwanohng, “Komwi me koapworopworpen Israel oh se sohte men luhsang komwi.”

¹⁸ Mwurin met pil mie ehu mahwen ong mehn Pilisdia kan nan Kop, ni ahnsowo Sippekai sang Usa kemehla kodon men me ede Sap.

¹⁹ Pil ehu mahwen ong mehn Pilisdia kan wiawi nan Kop, oh Elanan nein Sair sang Pedleem kemehla Kolaiad mehn Kad, me nah ketieu inenen mosul duwehte akmete ehu.

²⁰ Pil ehu mahwen wiawi nan Kad, wasa me kodon men mie me kin mwahuki pei. Sendinpeh me wenepwoat oh sendinneh wenepwoat. ²¹ E pelienda mehn Israel ko, a Sonadan, nein rien Depit ohl me ede Samma me kemehla.

²² Irail pahmen pwukat iei kadaudok en kodon kan en Kad; Depit oh sapwellime sounpei ko me kemeiraila.

22

*En Depit eh Koul en Powehdi
(Melkahka 18)*

¹ Iet koul me Depit ketin koulikihong KAUN-O ni rahn me e ketin kapitasang ih Sohl oh sapwellime imwintihti teiko:

² KAUN-O me silepei;
 ih me kelepei kehlail.

³ Ei Koht me silepei,
 I kin nekinek mwahu pahn kupwure.

E kin ketin pereiehla duwehte mehn sansar ehu;
 e kin ketin doareiehla oh kin ketin nekinekid ie.

Ih me ei sounkomour;
 e kin ketin apwahpwalih ie oh sinsile ie sang
 me suwed.

⁴ I kin likweriong KAUN-O,
 e ahpw kin ketin doareiesang ei imwintihti
 kan.

Kapinga KAUN-O!

⁵ Iloak en mehla lelieier,
 iloak en meninkauwo koaduhpwalihiedier.

⁶ Keper en mehla lelieier;
 oh sousou lidipiedier.

⁷ Nan ei apwal I ahpw likweriong KAUN-O;
 I likwerih ei Koht pwe en ketin sewese ie.

E ahpw ketin karonge ngilei nan tehnpese;
 e karongeier ei likwer en pek sawas.

⁸ Sampah eri rerada oh itikekda;
 poahsoan en lahng ahpw mwekidida oh
 rerada,
 pwehki Koht ketin engiengdahr!

- ⁹ Ediniei kusieisang nan sapwellime keinuhnu,
 mpwulen kisiniei oh mwoalus sang nan
 doauase.
- ¹⁰ E ketin ritingada pahnlahng oh ketidihdo
 ket pohn depwek toantoal ehu.
- ¹¹ E ketin pihrdi ket pohn kerupe kei,
 e ketin pihrki pehnpihr en kisinieng.
- ¹² E ketin perehkihla pein ih rotorot;
 depwek mosul kei, me diren pihl, kapilpene
 ih;
- ¹³ mwoalus mwehl pil kin lulda sang ni lioal
 mwowe.
- ¹⁴ KAUN-O eri ketin kapitie laudida rasehng
 ngirisek en nansapwe sang pahnlahng;
 kapitien Koht Wasa Lapalap ahpw sansalada.
- ¹⁵ E ahpw ketin kadar sapwellime arep ko oh
 katangapeseng sapwellime imwintihti ko;
 e ahpw ketin pwakihkinirailla piripir en sap-
 wellime lioal.
- ¹⁶ Nan kepin madau sansalada,
 oh poahsoan en sampah kan iang pwarada,
 ni ahnsou me KAUN-O ketin angiangihada sap-
 wellime imwintihti kan,
 oh kapitie laudida nan sapwellime engieng.
- ¹⁷ KAUN-O ahpw ketin kapahdihdo lime sang nan-
 leng oh ketin koliehda;
 oh ketin waikiehda sang nan kepin madau.
- ¹⁸ E ketin kapitiesang ei imwintihti kan,
 oh sang irail koaros me kin kailongkin ie—
 re me nohn kehlail sang ie.

e **22:11:** KERUP: Tehk ni kawehwehpen lepin mahsen kan.

- 19 Re mahweniong ie ni ahnsou me I mihla nan
apwal,
ahpw KAUN-O ketin sileiehdi.
- 20 E ketin seweseiehda nan ei apwal;
e ketin doareiehla pwehki eh kup-
wurperenkin ie.
- 21 KAUN-O ketin katingih ie pwehki ei kin wia
dahme pwung;
e kin kupwuramwahwih ie pwehki eh sohte
dipei.
- 22 I peikiong kosonned en KAUN-O;
I sohte sohpeisang ei Koht.
- 23 I kapwaiada sapwellime kosonned kan koaros;
I sohte kauwehla sapwellime mahsen kan.
- 24 E mwahngih duwen ei mwakelekel,
duwen ei kin kadohwansang ie wiewia sap-
wung kan.
- 25 Iei me e ketin katingih kin ie pwehki ei kin wia
dahme pwung,
pwe e ketin mwahngih duwen eh sohte dipei.
- 26 Maing KAUN, komwi kin ketin loalopwoat ong
irail kan me kin loalopwoat ong komwi;
komwi kin ketin kupwur mwahu ong irail kan
me kin unsek.
- 27 Komw kin kupwur mwakelekel ong irail kan me
kin mwakelekel,
ahpw kin kupwur toutou ong me suwed kan.
- 28 Komw kin ketin doarehla me aktikitik kan,
oh kin ketin katikitikihala me aklapalap akan.
- 29 Maing KAUN, komwi me kamarainpei;

komwi ketin kasarehsang ei rotorot.

- 30 Komw ketin kakehleiehda pwe I en mahwe-niong ei imwintihti kan
oh ketikihong ie manaman pwe I en kak powehdi arail kelen mahwen kan.
- 31 Koht menet—ia uwen deilahn wiepen nin lime kan,
ia uwen likilik en sapwellime mahsen kan!
E rasehng mehn sansar ehu
ong irail kan me kin rapahki sileparail reh.
- 32 KAUN-O kelehpw me Koht;
Koht kelehpw me soundoarepatail.
- 33 Koht menet, iei kelepei,
e kin ketin sinile elei kan sang apwal akan.
- 34 E ketikihong ie nehi kat en marahra duwehkte;
e kin ketin sinsile ie pohn nahna kan.
- 35 E ketin kaiahneiedahng ni mahwen,
pwe I en kak doadoahngki kesik ketieu me keieu kelail.
- 36 Maing KAUN, komw kin ketin sinsile ie oh doandoare ie;
sapwellimomwi sawas me kin kalinganeiehla.
- 37 Komwi me ketin sileiehdi pwe I en dehr lohdi,
oh I sohte mwahn pwupwudi.
- 38 I patohwan pwakihier ei imwintihti kan oh koliraildi;
I sohte kin tokedi I lao kamwomwirailla.
- 39 I keseiraildi, re ahpw sohla kak uhda;

- re wonohnehr nanpwel mwohn mesei kat.
- 40** Komwi me ketin kakehleiehda pwe I en kak mahwen
oh ketikihong ie I en powehdi ei imwintihti kan.
- 41** Komwi me ketin kupwurehda ei imwintihti kan pwe re en kin tangasang ie;
I kamwomwala irail kan me kin kailongkin ie.
- 42** Re kin repensawasseli, ahpw sohte emen me kin doareirailla;
re kin likwerieng KAUN-O, ahpw e sohte kin ketin sapeng irail.
- 43** I tiakirailpeseng, re ahpw duwehla pwelpar;
I kin sok pohrail rasehng ei kin sok nan pwelmatak en nanial akan.
- 44** Komwi ketin doareiesang nei aramas kahngohdi kan
komwi ketin koasoanehdi I en kaunda wehi kan;
aramas ekei me I sohte ese, met wialahr ei ladu.
- 45** Mehn liki kan kin poaridi mwohi;
ni ar kin rong ngilei, re kin peikiong.
- 46** Re kin nan kapehd tikitikla
oh rerrer kohieisang nan arail kelen mahwen kan.
- 47** KAUN-O ketin ieias! Kaping ong ei soundoar!
Kumwail lohkiseli roson en Koht me ketin doareielahr!
- 48** Ih me ketin kupwurehda I en powehdi ei imwintihti kan;
ih me ketin kalowehdiong wehi kan pahn ei manaman

49 oh ketin doareiesang ei imwintihti kan.

1 Maing KAUN, komwi me kin ketin kupwure ie
pwe I en powehdi ei imwintihti kan,
oh ketin silehsang ie aramas lemei kan.

50 I pahn kapinga komwi nanpwungen wehi kan;
I pahn kokoulkihong komwi koulen kaping.

51 Koht ketikihong sapwellime nanmwarkio en
kin powehdi;
e ketin kasalehda sapwellime limpoak
poatopoat ong me e ketin piladahro,
ong Depit oh kadaudoke kan kohkohlahte.

23

Kaimwiseklahn en Depit Mahsen kan

1 Depit nein Sehs, iei ohl me Koht ketin kasapwilada, me Koht en Seikop ketin pilada en nanmwarki, oh me kin wiahda melkahka kan en Israel. Iet kaimwiseklahn mahsen kan me Depit mahsanih,

2 Ngenen KAUN-O me ketin kalokalokaia ie;
audepen sapwellime mahsen mi ni kilin
eweiet.

3 Koht en Israel ketin mahsenier;
silepen Israel ketin mahsanihong ie:

“Nanmwarki me kin kaunda ni pwung,
me kin kaunda ni lemmwin Koht,

4 kin rasehng marain en ketipin me kin dakada
nimenseng ni eh kin sohte depwek,
ketipin me kin kalinganahda dipwen
nansapw akan mwurin keteu.”

- 5** Iei duwen Koht eh pahn ketin kupwuramwah-wih kadaudokei kan,
pwehki eh ketin wiahiong ie inou poatopoat
ehu,
inou ehu me sohte pahn ohla,
inou ehu me sohte pahn wekidekla.
Iei met me I patohwan anahnehn,
iei met me pahn wia lingan en ei powehdi;
eri, Koht uhdahn pahn ketin kapwaizada.
- 6** Ahpw aramas suwed kan pahn duwehte dihpw
tecatek me kin lekdekla;
sohte me kak doahke.
- 7** Ke pahn doadoahngki mete de ketieu;
re pahn rongala douluhl.

*Sapwellimen Depit Sounpei Ndand kan
(1 Kronikel 11.10-41)*

8 Iet mwaren sapwellimen Depit sounpei ndand kan: keieu Sosep Passeped mehn Takemon, me wia kaunen “Me Silimeno”; e peiki nah ketieuwo ong ohl welipwiki oh kemeirailla nan mahwente-hieu.

9 Keriaun ndand rehn me silimeno iei Eleasar nein Dodo, kisehn peneineien Aho. Rahn ehu ih oh Depit pelianda mehn Pilisdia kan me pokon-pene pwehn mahweniong mehn Israel kan. Mehn Israel ko pweiekla sang irail, **10** ahpw ih e sokedi tengeteng oh mahweniong mehn Pilisdia ko lao peh ko kehkla ih sohla kak kadar nah kedlahso. KAUN-O ketin powehdi rahno ni roson lapalap. Mwurin mahweno, mehn Israel ko pwurala wasa me Eleasar mihamie ie oh kihsang tehtehn mahwen ko rehn me melahr ako.

¹¹ Kesilimen en ohl ndand iei Samma, nein Akee mehn Arar. Mehn Pilisdia ko pokonpene Lihai, wasa me mwetuvel en wahntuhke ehu mie. Mehn Israel ko tangasang mehn Pilisdia ko, ¹² ahpw Samma sokedi tengeteng nan mwetuvelo, doandoare mwetuvelo, e ahpw kemehla mehn Pilisdia ko. KAUN-O ketin powehdi rahno ni roson lapalap.

¹³ Kerenieng ahnsoun dolung wahnsahpw, me silimen sang “Me Siliakano” ahpw kohla Peden Paipen Adullam, wasa me Depit ketiket ie, nindokon mehn Pilisdia kei mihami nan imwarail impwal ko nan Wahun Repaim. ¹⁴ Ni ahnsowo Depit ketiket pohn dohl ehu me kelpene, oh mehn Pilisdia kei kin koukousoan Serusalem. ¹⁵ Depit ketin loaleidda, e ahpw mahsanah, “Ia uwen ei men emen en wadohng ie nimei pihl sang ni pwarer me mi ni ewen kelen Pedleem!” ¹⁶ Sounpei ndand silimeno ahpw pepei kolahng nan kahnimpwal en mehn Pilisdia ko, re idipada pihl sang ni pwarero oh patohwandohng Depit. Ahpw e sohte men konote; ahpw e wudekihla pwehn meirongkihong KAUN-O. ¹⁷ E ahpw mahsanah, “Maing KAUN, I sohte pahn nim pihlet. Pwe ma I nim, e pahn rasehng me I niminim ntahn ohl silimenet me pangala ar mour nan keper laud.” Ih eri sohte konote pihlo.

Ih mepwukat wiewia kapwuriamwei en sounpei silimeno.

¹⁸ Apisai rien Sohap (inara iei Seruaia) iei ih me kaunen “Me Ndand Siliakano” E peiki nah kedlahso ong ohl silipwiki oh kemeirailla, e ahpw ndandla rehn “Me Siliakano.” ¹⁹ Ih me keieu

ndand rehn “Me Siliakano” oh wiahla ar kaun, ahpw e sohte ndand duwehte “Me Silimeno.”

²⁰ Penaia nein Sehoiada sang Kapseel iei pil emen sounpei ndand; e wiahda soangen wiewia kommwad kei; e pil kemehla sounpei wadawad riemen en Mohap. Rahn ehu e kohla nan pwoahr ehu ni ahnsoun sinoh oh kemehla laion emen. ²¹ E pil kemehla mehn Isip men, lapalahn ohl emen me kin weuwa ketieu pwoat. Penaia peikihong padda pwoat, oh kihsang nein ohl en Isipo ketieuwo ni peho, oh kemehkihla. ²² Ih met wiewia kapwuriamwei kan en Penaia, emen sang rehn “Me Siliakano.” ²³ E inenen ndand rehrail, ahpw e sohte ndand duwehte “Me Silimeno.” Depit ketikihong pwukoahn apwahpwalih soun-silepe kan en tehpaso.

²⁴⁻³⁹ Ekei tohn pwihn en “Me Siliakano” iei me iangahki:
Sounpei ndand koaros patpene me siliakan isimen.

24

Depit ketin wia Ntingdien Aramas (1 Kronikel 21.1-27)

¹ Pil ehu ahnsou KAUN-O pil ketin engiengda pahn mehn Israel, e ahpw ketin kupwurehda Depit en kahredohng pohrail apwal. KAUN-O eri mahsanihong Depit, “Kohwei wadekedi tohn Israel oh Suda.” ² Depit eri koasoanediong Sohap, kaun lapalap en sapwellime karis kan, “Kowe oh noumw lapalap akan kohwei rehn kadaudok en Israel koaros sang apali sahpwo lellahng apali,

oh wadekedi aramas akan. I men ese ia uwen tohtohn aramas akan.”

³ Ahpw Sohap sapeng nanmwarkio, patohwan, “Maing, Wasa Lapalap, KAUN-O en ketin katohtowehla aramas en Israel kan pak epwiki tohto sang rahnwet, oh komwi en ieias lao komw patohwan pweidahn kupwur en KAUN-O. Ahpw dahme Wasa Lapalap kupwurkihki wia irair wet?” ⁴ Nanmwarkio ahpw mahsanih Sohap oh nah lapalap ko en kapwaiada sapwellime kosonned; irail eri patopatohla sang pahn kupwure oh patohla wadekedi aramas en Israel kan.

⁵ Re kotehla Pillap Sordan oh kauwada imwarail impwal kan nin palieir en Aroer, kahnimw me mihte nanwerengen wahwo, nan sapwen Kad. Re ahpw douluhlsang wasao kohlahng paliepeng lel Saser, ⁶ oh kolahng Kilead oh Kades nan sapwen mehn Id. Mwuhr re ahpw kohla Dan, oh sang Dan re kohla palikapi lel Saidon. ⁷ Mwuhr re ahpw pil kohla palieir ni kahnimw kehlail Dair, oh douluhllahng kahnimw kan en mehn Id oh Kenan, oh Peersepa me keieu mwuhr, ni palieir en Suda. ⁸ Irail pwurala Serusalem mwurin sounpwong duwau oh rahn rieisek, mwurin ar kohseli nan sahpwo pwon. ⁹ Re pakairkihong nanmwarkio uwen tohtohn ohl me kak wia doadoahk en sounpei: ohl 800,000 nan Israel oh ohl 500,000 nan Suda.

¹⁰ Ahpw mwurin Depit eh aleier wadawaden aramas akan, e ahpw kupwur suwedla, ih eri mahsanihong KAUN-O, “I wiadahr dihp lapalap ehu ni ire wet. Maing, komw kupwur mahkohng ie. Pwe I sapwungalahr wiadahr doadoahk en

aramas pweipwei men.”

¹¹⁻¹² KAUN-O eri mahsanhong Kad, sapwellim-en Depit soukohp, “Kohwei rehn Depit oh ndahng en wia pilipil siluh. I pahn kapwaiada dahme e pahn pilada.” Nimenseng en mandahn rahno, mwurin Depit eh opala wasa, ¹³ Kad patohla reh oh padahkihong dahme KAUN-O mahsanh, oh kalelapak reh, “Eri, dahme komwi pilada? Sounpar siluh en lehk nan sapwellimomwi wehi de sounpwong siluh komwi en tangatan-gasang omwi imwintihti kan de soumwahu lusulus erein rahn siluh nan sapwellimomwi wehi? Komw kupwukupwure ire pwukat, oh mahsanhong ie omwi pasapeng me I pahn patohwanlahng KAUN-O.”

¹⁴ Depit ahpw sapeng, mahsanh, “I milahr nan apwal laud! Ahpw I sohte men ale lokolok sang rehn aramas. KAUN-O en ketin pein kalokei kiht, pwe ih me uhdahn kupwurkalahngan. ¹⁵ KAUN-O eri ketin kadardiong pohn Israel soumwahu suwed lusulus ehu me wiewiawi sang nimenseng lel ahnsou me kileldier. Mehn Israel isinen me mehla sang apali sahpwo lel apali. ¹⁶ Ni ahnsou me tohnleng en KAUN-O pahn kamwom-walahr Serusalem, KAUN-O ahpw ketin wekidala kupwure en kaloke aramas akan, e ahpw mahsanhong tohnlengo me kemekemeirailla, “Erier! Itarehr!” Ni ahnsowo tohnlengo patopato ni en Arauna, mehn Sepus men, eh wasahn kamwakele wahn kohn.

¹⁷ Depit patohwanda tohnleng me kemekemehla aramas ako, e ahpw patohwanohng KAUN-O, “Ngehi me dipadahr. Ngehi me wiahda sap-

wung. Dahme aramas pwukat wiadahr pwe re en lokolongki? Komw ketin kalokei ie oh ei peneinei.”

¹⁸ Ni rahnohte Kad patohla rehn Depit oh patohwanohng, “Komw ketla ni en Arauna wasahn kamwakele wahn kohn oh kauwada ehu pei sarawien ong KAUN-O. ¹⁹ Depit eri peikiong koasoandien KAUN-O oh patohla nin duwen me Kad padahkihongehr. ²⁰ Arauna kilengdihla oh kilangada nanmwarki oh sapwellime sounpei ko ar ketiket kohdahla reh. E ahpw poaridiong nanopwel mwohn Depit ²¹ oh patohwan idek, “Dahme Wasa Lapalap ketikihdo wasaht?”

Depit ahpw sapeng, mahsanih, “Ipahn pwainda omw wasahn kamwakele wahn kohnen oh kauwada ehu pei sarawi ong KAUN-O pwehn katokehdi soumwahu lusulus wet.”

²² Arauna ahpw patohwan, “Wasa Lapalap en ketikihda oh ketikidahng KAUN-O soangen meirong me komwi kupwurki. Iet kou kan mehn wia meirong isihs pohn pei sarawien; iet mehn wisik kan oh dinapw akan mehn wia tuwi.”

²³ Aruana patohwanohng nanmwarkio dipwisou pwukat koaros oh patohwanohng nanmwarkio, “KAUN-O sapwellimomwi Koht en ketin kupwure sapwellimomwi meirong.”

²⁴ Ahpw nanmwarkio ketin sapeng, mahsanih, “Soh! Ipahn pwain. I sohte pahn patohwandahng KAUN-O ei Koht meirong me I sohte medengki.” Ih eri pwainkihda wasahn kamwakele kohno oh kou ko silper limeisek. ²⁵ Ih eri kauwada pei sarawi ehu ong KAUN-O oh patohwanda meirong isihs oh meirong en kaminimin kei. KAUN-O eri

2 SAMUEL 24:25

lxxxix

2 SAMUEL 24:25

ketin kupwurehla oh ketin katokehdi soumwahu
lusuluso nan Israel.

**Pohnpeian Bible
The Holy Bible in the Pohnpeian language of the
Federated States of Micronesia**

copyright © 2006 Bible Society of the South Pacific

Language: Pohnpeian

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-10-27

PDF generated using Haiola and XeLaTeX on 22 Feb 2024 from source files
dated 21 Feb 2024

9fdb3393-5132-5d45-b635-9e2989395fdc